


KIDIMBU YA KIBULU

 Matondo. Mpe yandi tubaka, “Bumba munu na kati ya Nge.” Na yina, mu banza ti ya kele kitoko mingi. Mu zola yawu kieleka, kieleka. Matondo mingi na beno.

Mpe kieleka “Manima ya midi ya mbote,” na beno nyonso, “nkokila ya mbote,” mpe balusakumunu ya Nzambi kuvwanda na beno nyonso.

Ntangu yayi, ya kele, dyaka, na nkokila yayi, bweso ya beto na kuzibula bapaze ya Ndinga, awa, samu na kulongoka. Mu—mu ke zolaka kuyimba; mu zola kaka yawu. Mpe mu ke tubaka bambala mingi na bantu, “Ntangu beno ke kuma na Mazulu, kana beno lenda ve kutala munu na ziunga ya Kiti ya kimfumu kisika mosi kuna, beno kwenda kisika bawu ke na kuyimba.” Mpe mu—mu zola kuvwanda kuna. Mpe mu zola bankunga ya mbote. Kasi, na ntangu ya—ya lukutakanu ya Nsangu ya mbote, kisika balukanu fwana kubakama, mu banza, “Kaka nkunga mosi to zole, mpe beno luta na nswalu nionso na Ndinga. Beno pesa ntangu na Ndinga.” Beno me mona? Samu ti yina kele kima ya ngudi—ngudi: ya kele mbala mosi na Ndinga.

Ya vwandaka na muntu mosi na kati awa, bantu yina katukaka na ngaanda ya mbanza, bawu kele ya kuvwanda na roulette, kaka kuna na manima, bayina mu zolaka kukutana na mwa ntangu ya mbote na manima ya midi, kaka na ntwala ya balukutakanu. Kana bawu kele awa: mu ke lomba pardo ti mu me kondwa na mbwabanu yina; mpe mu ke mona beno na mbala mosi na manima lukutakanu me manisa; mpe beno lemvočila munu samu mu tubaka, “Mu ke vwanda awa,” kasi mu, bima yankaka me salama, ti, mu lendaka vwanda awa ve na ntangu yina.

Ntangu yayi, mbasi na nkokila. . . Beto ke fwanikisa ntangu nyonso kima mosi, Mfumu Yesu Klisto, kaka yina, mpe nyonso yina luzolo ya Yandi ya Kinzambi ke zola ti beto kusala. Kasi kana ya kele luzolo ya Yandi ya Kinzambi mbasi na nkokila, na zulu ya *Kidimbu Ya Nzambi*, beto ke zonzila, kana Mfumu zola.

² Mpe na nkokila yayi, beto me zabisa, kana Yandi. . . vwanda bweso ya Yandi samu na beto na kusala yawu, to bweso ya beto samu na beto na kusala samu na Yandi, mu zola kutuba, na nkokila yayi, beto zola kuzonzila na mosi ya malongi ya kulutila nene ya ngunga: *Kidimbu Ya Kibulu*.

³ Mpe mazono na nkokila beto vwandaka na bansungi ya dibuundu, *Bansungi Sambwadi Ya Dibuundu*. Mpe mbandukulu na Nsungi ya Dibuundu ya Ephèse, ya Ephèse; mpe beto sukaka na Nsungi ya Dibuundu ya Laodicée, nsungi ya dibuundu ya

nsuka. Mpe bika ti Mfumu kubwela balusakumunu ya Yandi ntangu yayi na Ndinga mutindu beto ke zonzila.

⁴ Ntangu yayi beto kulumusa bayintu ya beto na mwa ntangu fioti samu na bisambu, kaka na ntwala beto zibula Ndinga yayi ya Kinzambi.

⁵ Tata ya Mazulu, beto ke vutula matondo samu na bweso yayi yina beto me kuzwa na nkokila yayi, samu na kuvwanda ya moyo, mpe samu na kuvwanda awa na zulu ya ntoto, na nkokila yayi, mpe kuzwa mavimpi mpe ngolo, mpe beto lenda vwanda na kati ya kivinga, kisika ba ke tangaka Ndinga ya Nzambi.

⁶ Mpe beto ke sambila, O Mukudi ya kusakumuka, na kuvwandaka Tata Mukudi ya beto Yina me sukula beto na Menga ya Yandi, mpe yina vedisaka beto na disumu, mpe ntangu yayi ke na kutalisa beto na Tata, kukondwa foti, kati na Klisto Yesu; bika ti Nge kwiza, na nkokila yayi, mpe baka Ndinga mpe zibula Yawu na bantima ya beto. Bika ti Mpeve-Santu kusimba Ndinga mutindu ba ke longa Yawu, mpe bika ti Yawu kwenda mbala mosi na dyambu ya ngudi ya yawu, na konso ntima, na ntima ya munu mpe ntima ya bantu. Mutindu beto kele na nsatu ya Yawu, Tata, bika ti Yawu pesama na beto. Mpe bika ti muntu mosi ve kuvweza Ndinga. Mpe, Tata, kana na ntangu mosi mu lendaka tuba kima yina ke vwanda ya kuswaswana na lutwadusu ya Nge, ti Mpeve-Santu kukanga yinwa ya munu. Mu zola kaka kuzaba yina kele Kieleka, mpe na manima kutambula kuna na kati.

⁷ Sakumuna beto kintwadi ntangu yayi, lemvokila beto masumu ya beto, na yina beto me vukana na yinzo yayi ya kusambila. Mpe ti masumu ya beto kuvwanda na yisi ya Menga, mpe bampeve ya beto ya kutula na dibanza ya kulunga ya kusambila na ntangu yayi. Samu beto ke lomba yawu na Nkumbu ya Yesu. Amen.

⁸ Ntangu yayi, mu vwandaka banza kaka, mwa kitini ya papié yayi awa, mu sonikaka Masonuku mingi samu na . . . samu na kulandila, samu na kutanga, samu na kubanda. Mpe ntangu yayi ntangu mu ke mata awa, ya ke monana mutindu ti mu ke na nsatu ya kutanga mosi ya yawu ve. Ya kele konso ntangu mutindu yawu ke kwendaka; masonuku yiya to tanu na kubanda.

⁹ Kasi mu zola kutanga to kutuba yayi ntete, yina, na kuzonzaka, mu me banzaka ntete ve. Beno zaba, mu banza, kaka mutindu . . . Mu vwandaka diaka ve na dikani ya kutuba na yina beno ke salaka, beno me mona, kima mosi ve. Mu ke vingila kaka Yandi. Mpe kaka na ntangu mu ke mona yawu, mu ke tanda diboko mpe ke kuzwa yawu, mpe mu ke nata yawu. Mpe na yina bantangu yankaka ya lendaka wakana mwa ngolo, ntangu yankaka, kasi ya kele kaka mutindu mu ke kuzwaka yawu. Na yawu ya kele—ya kele kaka mutindu mu lenda pesa yawu.

¹⁰ Ntangu yayi, na yayi, ti ya . . . mu tuba dyaka na nkokila yayi. Yayi kele ve ya kuludika na ntwala ya muntu mosi to

nsambulu ya muntu mosi, beno me mona, ata fioti ve. Beto ke kwikilaka yawu ve. Beto ke kwikila ti beto kele bantu ya kieleka ya Amerika, ti muntu nyonso lenda kuzwa bweso ya kusambila Nzambi landila konsiansi ya yandi mosi. Mpe beto zola ti ya vwanda ntangu nionso mutindu yina. Kasi, na konso dibuundu, beto kele na malongi.

¹¹ Bambala mingi, na ba-organisation, na ba-denomination, bawu kele na credo. Mpe bawu ke bikana na zulu ya credo yina, “Yayi kele credo ya beto.” Ata yina mulongi ke banza, yandi fwana longa credo, samu ti yandi kele na kati ya denomination.

¹² Mpe na kati awa, beto kele ve na credo kasi Klisto, yawu yina kele credo; mpe ata musiku ve kasi zola; ata buku ve kasi Biblia. Mpe Klisto kele Yintu; mpe Biblia kele buku ya beto; yinza kele paroisse ya munu. Na yina mu ke zolaka—mu ke zolaka kulonga kaka mutindu mu me twadisama na kulonga, mpe kaka mutindu mu ke monaka yawu.

¹³ Mpe na manima na ntangu yayi, na kuzonzaka mingi-mingi na zulu ya lweka yayi ya mpasi mingi, ya ngolo, ya ngolo, ya kuzenga ya Nsangu ya mbote, kasi, beno zaba, yayi kele yinzo ya lufundusu. “Lufundusu ke bandaka na” (wapi kisika?) “yinzo ya Nzambi.” Kieleka. Awa kele kisika lufundusu ke bandaka. Mpe ya kele . . . Kana beno kwendaka awa na yinzo ya lufundusu, mpe beno zolaka kuzwa kumekama, ba kele na buku ya musiku kuna, ba fwana tanga musiku yayi, samu na kuzaba yina ba me fundisa beno. Mpe ya kele mutindu yina na yinzo ya Nzambi, beto fwana baka yawu na Ndinga ya Nzambi.

¹⁴ Mpe ntangu yayi, bambala mingi, na bima yayi, na yawu mu zola vwanda ya kundima ti beno ke bakula yayi ntangu yayi, ti, mu lenda vwanda na foti. Ntendulu ya munu lenda vwanda na kifu. Kasi mu ke meka na kutanga Yawu kaka pene-pene, mpe kutuba kaka mutindu Yawu me tuba. Beno bikana kaka na Masonuku, yina Yawu ke tuba na kutuba.

¹⁵ Mpe ntangu yayi ya kele kaka yimbi mingi, to . . . Mu banza ti ya kele ve luzolo ya Mfumu, mpe mu banza ti ya kele, Mu zaba ve, ti, mu ke zola kuvwanda na sabala mosi na manima ya sabala yayi na kati ya Buku yayi, kaka samu na kuvwanda awa mpe kutala yawu mbote kuna na Daniel, mpe Daniel na Apocalypse, mpe kuvukisa yawu na bapofete.

¹⁶ Mpe Ndinga ya muvimba ya Nzambi kele konso kitini ya kuvukana kintwadi. Babuku makumi sambanu na sambanu, ba sonikaka yawu na bantu mingi, bankama ya bamvula ke kabula, mpe ata mosi ve ke telemina yankaka, ata mosi ve. Mosi na mosi ya bawu vwandaka ya kulunga. Ata mbala mosi ve ti ya vwandaka kitini ya mukanda yina ba sonikaka mutindu Yawu, na yinza nyonso.

¹⁷ Ya me vwandaka, bamvula mafunda zole, ba ke na kumeka na kusoba Tata ya Beto. Samu na kubwela ndinga mosi na Yawu,

to kukatula Mosi na Yawu, samu na kukumisa Yawu mbote. Beno lenda kaka ve kusala yawu. Oh, Yawu kele ya kulunga. Yawu kele Ndinga ya Nzambi.

¹⁸ Mpe mu ke kwikila ti Biblia kele Ndinga ya Nzambi yina me twadisama na kimpeve. Konso Mpova ya Yawu me twadisama na kimpeve. Mu ke kwikila ve ti *yayi* me twadisama ve na kimpeve, mpe *yayi* kele, mpe *yina* kele. Mu ke kwikila ti Yawu nyonso me twadisama na kimpeve. To ya kele nyonso ya kulunga to nyonso ya luvunu; mpe kana Yawu kele nyonso ya kuvukana, kuna beto zaba ve yinki ya kusala. Kasi Yawu kele, konso kitini, Kieleka. Mu ke zola kupesa luzingu ya munu na ntangu nionso samu na yina MUTINDU ME TUBA MFUMU kele awa.

¹⁹ Ntangu yayi, ntangu yayi bawu ke na kuzwa kaka mwa bankokila yayi. Mpe, na yina, beto ke vwanda na lukutakanu ya Kilumbu ya sambanu na nkokila, beto ke kwenda kaka mutindu mosi, samu na kuzwa . . .

²⁰ Bayankaka na kati ya dibuundu tubaka ti bawu ke . . . bantu ya mvindu, ke kwisa na yinzo-Nzambi na Lumingu na suka, ti bayankaka ya bawu tubaka ti bawu ke vwanda Kilumbu ya sambanu na nkokila, na manima ya lukutakanu, mpe kusadisa na kusukula dibuundu samu ti bantu kukwiza ve na Lumingu na suka, to . . . to bawu zolaka sala ve na Lumingu, samu—samu na kukubika dibuundu. Beto ve . . . Beto zola . . . Mu kele ve muntu yina ke zitisaka Saba, kasi dyaka mu zola kuzitisa kusambila kaka pene-pene mutindu mu lenda.

²¹ Mpe ntangu yayi, na yina, mu banza ti mu ke zabisa mbasi na nkokila, mu banza, kana Mfumu zola, yina beto ke zonzila samu na Kilumbu ya sambanu na nkokila.

²² Ntangu yayi, na nkokila yayi ya kele: *Kidimbu Ya Kibulu*. Mpe mbasi na nkokila: *Kidimbu Ya Nzambi*. Ya kele zole ya kulutula . . . Mu banza, ya kele na malongi ya kulutula mfunu ya kuzonzila na kilumbu yayi, samu ti kieleka mu ke kwikila ti beto ke na kuzinga na ntangu ya kutala ya lufundusu yayi ya Nzambi. Mu ke kwikila ti beto kele na kilumbu ya yawu. Mpe beto zola vwanda ve muntu ya misiku. Beto zola vwanda ve muntu ya fanatiki. Beto zola kaka kubelama na yawu kaka mutindu ya kulunga mutindu Biblia ke zonza yawu awa; mpe Ya kele ya kulunga, ya kieleka.

²³ Mpe ntangu yayi na kusalaka yayi, beto ke kuwa bantu mingi, bubu yayi, kuzonzila na kidimbu ya kibulu. Beno me kuwaka yawu kubanda ntama, “Yinki ya kele? Nani ke salaka yawu? Wapi kisika? Nani ke kuzwa yawu? Mpe kana bawu kele na yawu, yinki—yinki ya ke sala na bawu? Yinki? Yinki? Ya ke sala beno mpasi? Ya kele—ya kele na kima ya yimbi na yawu?”

²⁴ Mbote, ntangu yayi, ya kele yina beto—beto zola kutala na Ndinga ya Nzambi, kima ya ntete, “Kana ya kele na kidimbu ya kibulu yina ba me zonzila na Biblia?” Mpe kima ya kulanda,

“Wapi nsungi ya ke vwanda? Mpe nani ke vwanda bantu yina ke kuzwa yawu? Mpe yinki beno ke sala? Beno lenda kuzwa yawu mpe kuzaba yawu ve?” Mpe nyonso yina, yina, kaka bakuyuvu yango mutindu yina. Na yawu, na mutindu ya mbote ya luzabu ya munu, ti—ti yayi ke vwanda mosi ya malongi zole ya kulutula mfunu ti mu lenda banza na kati ya Biblia, *Kidumbu Ya Kibulu*, mpe *Kidumbu Ya Nzambi*.

²⁵ Ntangu yayi, ya ntete, mu kele na Masonuku awa samu na kulakisa kana . . . to mu sonikaka yawu kaka, na yawu mu lendaka baluka na Yawu, mpe ya kele Santu . . . Na kubanda, beto tala kaka yina kidumbu ya kibulu kele, mpe, “Ya ke pesa boma na kuzwa kidumbu yayi? Ya kele yawu?” Ntangu yayi na Apocalypse, kapu ya 14 mpe nzila ya 9, ya kele nsangu ya wanzio ya tatu. Ntangu yayi, kizabi nyonso ya Biblia . . .

²⁶ Mu ke mona Mpangi Stanley awa, mpe milongi zole to tatu ya kulutula ya kuvwanda awa. Mpe mazono na nkokila ya vwandaka na mwa bampangi awa yina katukaka na seminere ya ba-Baptiste na Louisville, mpe ntangu yankaka ya kele na bayankaka na nkokila yayi. Mu zaba ve. Mpe mu banza ya kele na ba-Methodiste, ba-Baptiste, ba-Catholique, mpe lendaka vwanda Juif ya Orthodoxe. Mu zaba ve. Kasi ya kele ve . . .

²⁷ Yayi kele ve samu na kuniongisa bansatu ya muntu mosi; ata fyoti ve. Mpe ya kele kaka samu . . . Kaka mutindu Biblia kele ya kusonika, samu na kutanga Yawu, mpe ti beno tala Yawu, beno mosi. Mpe beto kukuma pene-pene na Yawu kaka na mutindu ya mbote mutindu beto zaba, na boma ya Nzambi, na kuzabaka ti Yandi ke bedisa beto samu na bandinga ya beto. Bandinga ya beto ke sakumuna beto to ke fundisa beto na Kilumbu ya Lufundusu.

²⁸ Mpe kana mu kuwa ti mu zaba kima mosi, mpe mu bumba yawu, na yina Nzambi ke sala ti mu futa samu na yawu na Kilumbu ya Lufundusu; mpe mioyo na maboko ya bawu, na kutubaka, “Mpangi Branham, kana nge lendaka tuba kaka na beto, beto zolaka vwanda ve mutindu yayi bubu yayi.”

²⁹ Mu zola kutelama mutindu Paul na ntama kuna, “Mu kele na kimpwanza ya menga ya bantu nyonso. Samu ti mu me bumba kima mosi ve na kuzabisa na beno bandongosolo nyonso ya Nzambi.” Ya kele kieleka, kaka mutindu mu ke mona Yawu; mpe kana mu kele na foti, na yina Nzambi lemvokila munu. Bima yayi ke kwisaka ata fioti ve . . . Mu me kwendaka ata fioti ve na seminere, ata mbala mosi ve mu me kwendaka na lukolo mosi, ata mbala mosi ve mu me bakaka mpova ya muntu yankaka samu na Yawu. Mu kwendaka mbala mosi na kati ya Biblia, na kisambu. Mpe yayi kele mutindu ya Kinzambi yina me monisama na nzila ya Mpeve-Santu, Wanzio mosi ya Nzambi yina ke twadisaka munu na kumona ba-vision mpe nyonso yankaka

mutindu yina, mpe kubeluka ya bambevo. Mpe beno lenda tala yawu kana Yawu ke vwanda kieleka to ve.

³⁰ Ntangu yayi, yayi kele nsangu ya wanzio ya tatu, na yinza. Mpe beno zaba yinki, nsangu ya wanzio ya tatu, yawu ke basika ntangu yayi na kilumbu yayi. Yayi kele kupumbuka ya nsangu ya wanzio ya tatu, kana beno kele muntu yina ke tangaka Biblia.

³¹ Ya vwandaka na bakiadi tatu yina landaka yawu. Ya ntete salamaka na Mvita ya Ntete ya Yinza ya muvimba. Ya zole yina salamaka na Mvita ya Zole ya Yinza ya muvimba. Beno me mona na yina beto ke na kukota ntangu yayi. Mbote mingi. Beto me kuma na nsuka ya nzila.

³² Ntangu yayi beto baka yayi na dibanza ya beto, kaka ntete beto tanga Masonuku. Landila ntelamanu, beto kele kieleka na nsungi ya nsuka. Bilumbu yikwa? Mu zaba ve; muntu mosi ve zaba.

³³ Kasi, beno tala, beto baka yawu landila disolo. Bamvula mafunda zole ya ntete, ndonga ya yinza kumaka na kisika ya zulu, mpe Nzambi bebisaka yinza na maza. Beno zaba yawu? Na manima ya me basika mutindu yinza ya malu-malu. Mpe bamvula mafunda zole ya zole, yawu kumaka dyaka na nsuka ya yawu, mpe Nzambi fidisaka Yesu. Ya kele kieleka? Yayi kele nsuka ya bamvula mafunda zole yina ke landa, na 1954. “Mpe Nsangu ya mbote,” Yesu tubaka, “ba ke zenga kisalu,” (Samu na yinki?) “samu na misolami, to ata nsuni ve ke kuzwa mpulusu,” ya ke vwanda yimbi mingi. Na yawu beto kele na ntangu ya nsuka. Mpe na manima ya sambwadi, na kifwanikusu, ya kele Millenium, bamvula funda mosi.

³⁴ Mutindu Nzambi salaka bamvula mafunda sambanu, beto zaba ti funda mosi ya bamvula . . . “Kilumbu mosi na Mazulu kele funda ya bamvula na zulu ya ntoto,” Pierre ya Zole. Beno me mona? Ntangu yayi, mpe Nzambi tungaka yinza na bamvula mafunda sambanu. Mpe Dibundu me sala samu na disumu ntangu yayi bamvula mafunda sambanu. Mpe funda ya sambwadi, Nzambi kwandaka pema, mpe pemaka na kilumbu ya sambwadi; mpe ntangu yayi ya kele kifwanikusu ya Millenium, Dibundu samu na kuzinga awa na zulu ya ntoto, kaka awa na mutindu ya nzutu, samu na bamvula funda mosi, kukondwa kimbevo, kiadi, mpasi, to lufwa. Nsungi yango ya nene, ya wolo ke na kukwizaka ntangu yayi! Oh, samu na yawu! Oh, mu zola nkunga yina:

Ntoto ke na kuboka, ke na dila samu na
kilumbu ya kimpwanza,
Ntangu Yesu ke vutuka diaka na ntoto.

mu zola yawu.

Disumu mpe mawa, mpasi mpe lufwa ya yinza
yayi ya mpimpa ke suka,
Na kimfumu ya nkembo na Yesu ya bamvula
funda mosi ya ngemba.

Biblia ke tuba, “Bawu ke yala mpe ke yala na Klisto bamvula
funda mosi,” Millenium.

Ntangu yayi, nsangu ya wanzio ya tatu yayi, kaka na
ntwala ya Nkwizulu ya Mfumu, ntangu Kidimbu mpe kidimbu
kutulamaka. Ntangu yayi ya ke vwanda na kuvukana ya nene,
kuvukana.

³⁵ Kuna na Wesete, ntangu beto ke kwendaka kuna, mu
vwandaka sala yawu, kubanda mu vwandaka mwana-bakala ya
ntwenia, mu vwandaka kwenda samu na kuvukana ya Printemps
mpe samu na kuvukana ya Automne, mu vwandaka kwenda
na myongo samu na kuzomba bitwisi. Mpe na manima beto ke
kuzwa bibulu nyonso yina beto lenda kuzwa, na kisika nyonso,
na yina beto ke katula nionso yina kele ve ya ku- . . . yina kele ve
ya beto. Ya beto kele na kidimbu, mpe ba kele na kidimbu. Mpe
kana beno me . . .

³⁶ Muntu mosi me monaka mutindu ba ke tulaka kidimbu na
bitwisi? Ya ke yitukisa na kutala kidimbu ya bitwisi. Mu vwanda
tala kyadi samu na ngombe ya kento. Mpe ya kele kima ya
boma mingi ntangu beno ke banda na kutula kidimbu na bitwisi.
Kisalu ya munu vwandaka kuyangula na tiya kisengo tii ya ke
kuma mbwaki, kusimba kisengo. Mpe ba ke tula yawu na zulu ya
mwana ya ngombe ya ntwenya mosi ya kento ba me tanda kuna,
mpe makulu ya yandi ya kukanga; mpe ba ke tula kidimbu yina
na zulu ya yandi, mpe mika mpe nsuni ke zika; ba ke tula mwa
goudron na zulu ya yawu, mpe ba ke bika yandi. Mpe yandi ke
kima! Ya kieleka yandi ke kima. Kasi, beno tala, ba me tula yandi
kidimbu.

³⁷ Mpe ya kele mutindu Nzambi ke salaka beto. Beno fwana
kwenda na autel na maboko mpe makulu ya kukanga, mbala
mosi na mwa ntangu fyoti. Kasi, mpangi, ntangu Mpeve-Santu
me tula ntete kidimbu na zulu ya beno, beno lenda sala kima
mbangu mpe kuboka, kasi ba me tula beno kidimbu. Ya kieleka.
Beno kele kuna. Ntangu Mfumu ya kisalu ke kwiza, Yandi zaba
ya nani beno kele.

Kasi, oh, samu na mwana ya kibulu yina ya ntwenia, yina ba
me fundisa samu na kulosama na kati ya miyibi ya bitwisi.

³⁸ Ntangu yayi, yayi kele ntangu ya kutula kidimbu. Mpe
ntangu yayi ya ke vwanda kaka na minati-mpunda zole na kati
ya yayi, ya kele Nzambi mpe Satana. Satana ke baka bantu ya
yandi, mpe Nzambi ke baka bantu ya Yandi. Na nkokila yayi
beto ke mona nani ke lwata kidimbu ya Satana, mpe mbasi na
nkokila beto ke mona nani ke lwata kidimbu ya Nzambi, landila
Ndinga ya Nzambi.

39 Ntangu yayi awa kele nsangu ya wanzio, na nzila ya 9 ya kapu 14. Mu ke tanga mwa Masonuku yayi awa, yina mu sonikaka. “Mpe wanzio. . .”

Mpe wanzio ya tatu landaka bawu, na kutubaka na ndinga ya ngolo, Kana muntu kusambila kibulu mpe kifwanisu ya yandi, mpe kuzwa kidimbu ya yandi na mbunzu ya yandi, to . . . na diboko,

Mutindu mosi ke kunwa vinu ya nganzi ya Nzambi, yina me tiamuka kukondwa kuvukisa na kati ya mbungu ya nganzi ya yandi; mpe . . . ba ke kwamisa yandi na tiya mpe sufulu na ntuala ya bawanzio ya santu, mpe na ntuala ya Mwana-dimeme:

40 Ya kieleka beno zola ve kima ya kusala na yawu! Beno tala.

Mpe mulinga ya nkwasusu ya bawu vwandaka mata samu na ntangu nyonso mpe ntangu nyonso: mpe bawu kele ata na ngemba ve kilumbu to mpimpa, bayina ke sambilaka kibulu mpe kifwanisu ya yandi, mpe muntu nyonso yina ke kuzwa kidimbu ya nkumbu ya yandi.

41 Mu zola ve kima ya kusala na yawu, mu ke kwikila. Yinga. Beno kuwa nzila yina ke landa, na yina mu ke na kutala yawu.

Awa kele mvibudulu ya basantu: awa kele bawu yina ke zitisaka balutumu ya Nzambi, mpe kele na lukwikilu na Yesu Klisto.

42 Ntangu yayi kapu ya 15, mpe nzila ya 2. Mpe . . . Beno kuwa ntangu yayi, na kapu ya 15 mpe na nzila ya 2. Ntangu yayi, beto vwandaka tanga kuna na nzila ya 14, mpe na nzila ya 9. Ntangu yayi na nzila ya 15, mpe na nzila ya 2.

Mpe ya ntete yina kwendaka, mpe tiamunaka mbungu ya yandi na zulu ya ntoto; mpe bamputa ya yimbi kubwaka . . . ya mpasi mingi kubwaka na zulu . . . bantu yina vwandaka na kidimbu ya kibulu, mpe na zulu ya bawu yina ke sambilaka kifwanisu ya yandi.

Kapu 16 mpe nzila ya 2.

Mpe na yandi bantinu ya ntoto me sala kindumba, mpe bantu yina ke zingaka na ntoto vwandaka me lawuka na vinu ya nganzi ya kindumba.

43 Kaka minuti. Beno lemvokila munu. Mu me balula, mu me balula zole ya bawu na mbala mosi. Mbote mingi. Ntangu yayi kapu ya 20 mpe nzila ya 4. Mbote mingi, beto bawu yayi.

Mpe mu me monaka bakiti ya kimfumu, mpe bayina vwandaka kuna na zulu ya bawu, mpe lufundusu pesamaka na bawu: mpe mu monaka mioyo ya bayina kufwaka samu na kimbangi ya Yesu Klisto, mpe samu na ndinga ya Nzambi, mpe bayina sambilaka ve kibulu, to kifwani ya yandi ve, to dyaka kuzwaka ve kidimbu

na mbunzu ya bawu, to na diboko ya bawu; mpe bawu zingaka mpe yalaka na Klisto bamvula funda mosi.

44 Ba lenda ve kuzwa kidimbu ya kibulu mpe na manima kusambila Klisto to kuvwanda na Yandi. “Kasi muntu nyonso yina ke sambila kibulu to kifwani ya kibulu, ba ke kwamisa yandi na ntwala ya Nzambi mpe na ntwala ya bawanzio ya santu.” Ya kele yina Mfumu me tuba samu na yawu.

45 Ntangu yayi beto ke banda. Beno baka Biblia ya beno ntangu yayi na kapu ya 13 ya Apocalypse, mpe beto ke banda kaka na mwa ntangu fyoti. Ntangu yayi yayi kele mfunu mingi. Mpe beno kuwa na bukebi ntangu yayi.

46 Ya ntete, beto zola kubaka dilongi ya beto ya mazono na nkokila. Mazono na nkokila beto bakaka bansungi ya dibuundu, ti, mutindu beto monaka Yesu ya kutelama na kati ya Dibuundu ya Yandi, “Na kuzonzaka mutindu ndinga ya bamaza mingi; mpe Yandi vwandaka na nsuki mutindu mika ya dimeme; meso mutindu milaka ya tiya.”

47 Beno bambuka moyo, Apocalypse nyonso kele vision, mpe ya kele na bidimbu. Nyonso ya yawu kele na mbangululu, na yawu beno fwana sala keba. Beno tanga baprofete, beno mona yina bidimbu zola kutuba, na yina beno fwanikisa yawu awa samu ti beno zaba yina bidimbu kieleka zola kutuba.

48 “Ya vwandaka na meso mutindu milaka ya tiya,” yina vwandaka kima mbangu na ntoto. Mpe beto monaka milaka yango, mutindu . . . “Bambele, mbele vwandaka basika na yinwa ya Yandi, mpe mbele ya meno zole,” mpe beto monaka ti ya vwandaka Ndinga ya Nzambi yina basikaka na yinwa ya Dibuundu. “Mpe Yawu zolaka zenga mpe butomfo ya mukwa, mpe mufundisi ya mabanza mpe bansatu ya ntima,” Hébreux kapu ya 4.

49 Beto me mona Dibuundu ya kutelama kuna na kitoko ya Yawu; Klisto me sala kaka na kati ya Yawu! Mpe Dibuundu vwandaka na “lele” ya mpembe. Mpe beno tala, Ya vwandaka kento, “na ziunga ya ntulu,” Ya vwandaka na lele yina vwandaka kufika nsoni ya Yandi; mpe vwandaka na “nsinga ya wolo” ya kubaluka pene-pene ya yawu, yina vwandaka kanga yawu na ntulu. “Mpembe,” na kuzonzaka na ludedomo ya Klisto; mpe “nsinga ya wolo” vwandaka monikisa Nsangu ya mbote. Kulonga ya Nsangu ya mbote ke nata Mpeve-Santu na zulu ya Dibuundu, ludedomo ya Klisto; ke kanga yawu kuna, ya kukangama na nsinga, nsinga ya luketo.

50 Na yina Yandi vwandaka ya kutelama kuna, “makulu mutindu kisengo, yina vwandaka me yokama na dibulu ya tiya.” Kisengo ke zonzila lufundusu ya Kinzambi. Mpe Nzambi, samu na kuzengaka ndefi ya Yandi ya nene yina Yandi salaka, Yandi fidisaka Klisto, mpe Klisto futaka lufundusu ya Kinzambi. Mpe kuna Dibuundu kele ya kuvwanda na zulu ya lufundusu ya

Kinzambi, Klisto me telama na kisika ya Yawu. Wapi foto ya kitoko, “Ya kutelama na Minda Sambwadi ya Wolo!”

⁵¹ Mpe kuna beto ke tala ti nsungi ya dibuundu ya ntete, yina bawu kuzwaka. Bantu yikwa vwandaka awa mazono na nkokila? Ti beto mona diboko ya beno. Mbote mingi, ya kele mbote. Nsungi ya dibuundu ya ntete, beto talaka, na Nsungi ya Dibuundu ya Ephèse, ba vwandaka na mbotika ya Mpeve-Santu. Mpe ba botikaka bantu na kati ya masa, mpe ba vwandaka. . . Bidimbu mpe mambu ya ngitukulu ya mutindu nionso zolaka tambula na mukwikidi.

⁵² Mpe na wapi mutindu, kuna na konso nsungi ya dibuundu, Yawu bandaka na kuzimbana. Na nsungi ya zole, ya tatu, na manima na kati ya nsungi ya mudidi. Mpe bawu basikaka na nkumbu ya luvunu, na mbotika ya luvunu, bawu zole samu na maza mpe Mpeve-Santu.

⁵³ Mpe na manima bawu landilaka, na nsungi yina landaka, mpe bawu kuzwaka mwa nsemo. Mpe kuna ya vwandaka na mwelo ya kutula, samu na kuzibuka, na kati-kati ya Philadelphie mpe Nsungi ya Dibuundu ya Laodicée.

⁵⁴ Mpe na manima Laodicée me kuzwa tiya ve madidi ve mpe me basika mbala mosi na Yawu nyonso, tii Nzambi basisaka yawu na yinwa ya Yandi. Ya kele kieleka. Ya kele Masonuku.

⁵⁵ Mpe konso mukwikidi ya masolo mpe konso mukwikidi ya ba-orthodoxe zaba ti Bansungi Sambwadi ya Dibuundu, to “Minda Sambwadi ya Wolo,” mutindu Biblia ke tuba, vwandaka Bansungi Sambwadi ya Dibuundu. Mutindu Ngwisani ya Ntama kele kifwanukusu na ya Malu-malu awa, mpe kaka mutindu yawu basikaka.

⁵⁶ Kasi ya ke vwanda na kuningana ya nene mpe reveil kaka na nsuka ya nsungi ya Bantu ya makanda, na ntwala ba-Juif kubaka Yawu diaka.

⁵⁷ Beno bambuka moyo, ba me sala ndilu kaka Bantu ya makanda, ntangu kele na lutangu ya ntangu samu na lemvo. Biblia me tuba, “Ba ke diata bibaka ya Jérusalem,” Yesu tubaka, “tii ntangu kilumbu ya Bantu ya makanda ke manisa.” Ya kele kieleka. Ya kele na ntangu ya kieleka ya kumanisa.

⁵⁸ Mpe beto ke mona bima yina bawu salaka na manima kuna. Beto ke tala bidimbu mpe mambu ya ngitukulu yina ke tambula na bawu, mutindu Klisto tubaka na bawu mutindu ya vwandaka mbote, mpe mutindu bawu vwandaka. Mpe na manima Nsemo bandaka na kukulumuka mpe kukulumuka, yawu kufwaka. Mpe kuna kaka na nsuka, ya zolaka vwanda kyelo yankaka ya kuzibuka ya kutula samu na Dibuundu. Ntangu yayi beto telama kaka awa ntete beto kota na yawu. Beno tala, beto baka profesi yankaka yina me kwisa na mabanza ya munu. Profete tubaka, “Ya ke vwanda na kilumbu ntangu ya ke vwanda to mpimpa to mwini ke vwanda ve.”

59 Mu ke zonza na ngolo mingi? [Dibuundu me tuba, “Ve.”—Mu.] Kana beno lenda, beno lenda bula mwa. . . Mu zaba ti ya ke sala makelele, mpe ya kele samu na yina mu ke zonza mwa ngolo, na yawu bantu na manima ke vwanda kieleka na kuwa yawu. Samu ti, Yayi kele mfunu mingi.

60 “Mpe ya ke vwanda na ntangu mosi, kilumbu mosi,” profete tubaka, “yina ke vwanda ve mpimpa to mwini.” Na nzonzolo yankaka, ya ke vwanda na nsemo, kasi ya ke vwanda na matuti mingi, beno me mona, kilumbu ya matuti mingi. “Kasi na ntangu ya nkokila ya ke vwanda na Nsemo.” Wapi foto ya kitoko!

61 Ntangu yayi, ntangu muntu ya matuti vwanda kubwa na kilumbu ya matuti, yina zola kutuba ti bamvita ke vwanda, mpe bampasi, mpe bakumata mpe bakukulumuka, mpe bansungi, mpe mabuundu, mpe ba-isme, mpe nyonso. Ya ke vwanda ve na nsemo to mpimpa. Ya ke vwanda ntangu yina beto zaba ti ya kele na Nzambi, mpe ya kele na Nsangu ya mbote, kasi ba lenda kaka ve kumona na nzila ya Yawu. Beno zaba yina mu zola kutuba? Ba ke tuba, “Biblia ke tuba ti bawu salaka *yawu* kuna na Pentecote, bawu salaka *yawu* na Dibuundu ya ntete, bawu wandaka na bidimbu mpe mambu ya ngitukulu yayi, kasi dibuundu ya beto—ya beto ke longa Yawu ve.” Beno me mona, ya kele na matuti mingi, to ya mpimpa to ya kilumbu. “Kasi, dyaka, beto ke kwikilaka na Yesu Klisto. Beto ke kwikilaka na Nkwizulu ya Yandi ya zole, mpe beto zaba ti Yandi ke kwisa.”

62 Biblia ke tuba, “Ya ke vwanda na nsemo to mpimpa ve.” Beno lendaka bokila yawu ve kilumbu, mpe beno lendaka bokila yawu ve na nkokila. Kasi, beno tala, “Na ntangu ya nkokila ya ke vwanda na Nsemo,” na ntangu ya nkokila!

63 Ntangu bantu ya esete. . . Buku yayi kele Buku ya esete; Biblia kele. Ntangu Nsemo ya ntete na Dibuundu ya ntete basikaka, na Ephese, mbote, beto wandaka na ngonda ya kumi mpe monaka yina kusalamaka kuna; Nsemo ya Nzambi me nata na nzila ya Yesu Klisto, na kutsyamuka ya Mpeve-Santu. Yawu pesaka Nsemo na yinza ya muvimba, mpe sonikaka Biblia. Ya kele kieleka?

64 Ntangu yayi Yandi silaka, na yinza ya wesete, mwini ke basikaka na esete, na mbandukulu ya nsungi ya lemvo, mpe ntangu yayi mwini ke na kukotaka na wesete, na bantu ya wesete. Beto kele bantu ya wesete. Mpe Yandi silaka ti ya ke vwanda na reveil mpe ya ke vwanda na Nsemo na ntangu ya nkokila. Beto kele awa. Nsemo ke na kulezima, “mpe mpimpa me bakula Yawu ve.” Kaka yina. “Bantu ke zolaka bisalu ya yimbi kulutila bisalu ya mbote.”

65 Kasi ya ke na kuluta kaka na zulu ya kibaka ya boma kuna. Mpe Nsemo yina ya fioti beto ke na yawu, beno kangama na Yawu. Beno tala, Ya kele mwini mosi yina telamaka kuna na zulu ya ba-Juif, ya kele ya kuvwanda awa na zulu ya Bantu

ya makanda. Nzila nyonso na nsungi awa, na nzila ya bamvula mafunda zole yayi, ba vwandaka na *yayi*, mpe *yina*, mpe ba-organisation mpe bansungi, mpe *yayi* mpe *yina*. Mpe bantu me zaba ve kisika ba me telama.

⁶⁶ Kasi bansilulu ya Biblia, Nzambi salaka, na nzila ya profete, ti, “Na ntangu ya nkokila ya ke vwanda na Nsemo.” Ya ke vwanda na Nsemo na ntangu ya nkokila. Mu banza ti beto kele awa. Mwini ke na kukotaka. Yinza nyonso ke na kunyonga, ke na kubokaka samu na kilumbu yina. Beno tala.

⁶⁷ Ntangu yayi beto ke tala, ti, yina bawu kuzwaka kuna na nsungi ya dibuundu ya ntete, bawu kuzwaka malongi ya ngitukulu. Kima ya ntete, ya kumaka kaka “bisalu.” Yandi tubaka, “Nge ke yinaka bisalu ya ba-Nicolaïte.”

⁶⁸ Mu ke kukiyufula yina ba-Nicolaïte vwandaka? Mu talaka yawu, mpe na nzila ya masolo, dyaka mpe dyaka mpe dyaka, na nzila ya milabu ya kulutila mbote mu lendaka kuzwa, mpe muntu ve lenda zaba, kana ti ya vwandaka malongi yina ba bandaka na nzila ya muntu, Nic, Nicolas, yina ba ke tubaka ti zolaka vwanda mosi ya bantumwa yina kwendaka fioti na lweka. Yandi tulaka yandi na credo, to kima yankaka, mpe kuna bandaka ba-Nicolaïte. Ya vwandaka bisalu, na kubanda. Mpe yinki vwandaka “bisalu” na Ephèse, na nsungi ya dibuundu yina landaka kumaka “malongi.” Mpe kuna kotaka na bansungi ya mpimpa ya lukwamusu.

⁶⁹ Ntangu yayi malongi mosi ya ba-Nicolaïte yina bandaka awa na dibuundu ya ntete, na manima ya bimvuka tatu to yiya ya ntete ya bantumwa, ya kumaka kisalu. Bawu bandaka na kubanza, “Mbote, *yayi* ke vwanda Yawu.” Ntangu yayi beno nyonso zaba mutindu yawu me basika, mpe beno mitangi ya Biblia.

⁷⁰ Ntangu yayi, ya bandaka pene ya bamvula 600 ya Ntangu ya Beto mpe . . . to 306, yina ba ke bokilaka lupindulu ya Constantin. Yandi ata mbala mosi ve kundimaka. Muntu yina ke sala bima ya mvindu yina muntu salaka, yandi ndimaka ve. Ya kele kieleka. Kima kaka yina yandi salaka, yina vwandaka na nsambulu mosi—mosi na yawu, yandi tulaka kulunsi na dibuundu ya Santu Sophie. Ya vwandaka ve na kima mosi, yina kwendaka na Mazulu? Mbote mingi. Yandi tubaka na Baklisto, kana yandi nungaka mvita yina, yandi ke kuma Muklisto. Mpe bawu sambilaka. Mpe yandi basikaka mpe nungaka mvita, to nungaka bitumba, mpe yandi vutukaka mpe tubaka, “Mbote, mu ke kota na dibuundu.” Kifwanukusu ya kitoko mingi ya mambele ya dibuundu ya tiya ve madidid ve bubu yayi. Ya kieleka. Tula kulunsi na zulu ya dibuundu.

⁷¹ Na manima ya lufwa ya yandi . . . Yandi vwandaka na bana zole ya babakala, bana tatu; Constantin, Constance, mpe Constans-tinople, ti yawu bandaka samu na kusala esete mpe

wesete ya Rome, mpe bawu kabwanaka. Mpe na kati kuna, na yina, beto kumaka Kimfumu ya Ottoman, na ntangu yina.

⁷² Mpe na yina, bawu, pene ya kimvuka ya zole, to ya tatu, kimvuka ya yiya ya bantumwa; mpe kuna, kima ya ntete beno zaba, bawu bandaka na kuswana na kati ya mosi na yankaka. Mpe bawu kabukaka, mwa isme.

⁷³ Muntu nyonso, beno baka dibuundu...Kuna, ntangu dibuundu yango ya ba-Méthodiste ya Wesley vwandaka na ngolo, yandi vwandaka na ngolo ntangu John Wesley vwandaka awa. Ba-Luthérien vwandaka, na kilumbu ya yawu; mpe bawu nionso. Kasi bika mubandisi kufwa, mbala mosi, mpe na manima bawu ke zimbana.

⁷⁴ Ntangu Mfumu ya ntete monikaka kuna na manima; ntangu ba zolaka ti mu banda, kusala organisation na Yayi, nyonso mutindu yayi. Mu kwendaka awa, mpe mu monaka kisika Dwight Moody, mubandisi ya nene, Institut Biblique Moody. Mpe mu banzaka, “Kana Dwight Moody lendaka tala na zulu ya Institut Biblique yayi; yina muntu yina vwandaka kuna, mpe yina bawu ke sala ntangu yayi!”

⁷⁵ Mbote, mu tubaka, “Tala awa, tala, yinki kana—yinki kana Wesley, Calvin, Knox, Finney, Sankey, to Finney, mosi na mosi ya bawu, lendaka vumbuka bubu yayi, mpe kumona dibuundu ya bawu kisika ya kele!” Oh, la la! Beno me mona, kimvuka ya ntete, ntangu muntu kele ya kutelama kuna, yandi ke simba Kieleka.

⁷⁶ Beno tala Docteur Dowie na Mbanza ya Sion, na yina, bubu yayi, ba ke seka na kizizi ya kubeluka ya Kinzambi, ntangu ba vwandaka tula mbanza na zulu ya yawu. Kasi ntangu Dowie kufwaka, na manima kwizaka yina... Blake, John Lake mpe bawu nyonso. Na yina, kima ya ntete beno zaba, yandi me kuma na nsuka ntangu yayi tii ba-Assemblée ya Nzambi ke kota na yawu, mpe nkonga ya nene ya bantu ya misiku mpe nyonso. Mpe dibuundu me suka mpe me kuma retrograde, mpe na mutindu ya boma.

⁷⁷ Na yina mu me mona yayi, Biblia me tuba, “David sadilaka Mfumu mbote na nsungi ya yandi.”

⁷⁸ Na yawu mu tubaka, “Mfumu, mu zola organisation mosi ve. Bika mu sadila Nge na ntima ya munu ya muvimba, na yina mu kele awa ke na kuzinga.” Ya kieleka. “Yina ke landa, Nge ke kuzwa muntu yankaka ntangu mu ke kwenda. Nge ke kuzwa muntu kubaka kisika ya yawu.” Kaka yina.

⁷⁹ Beno meka ve na kutunga na zulu ya kima yankaka. Beno lenda ve kutunga tiya na kima yankaka. Israel zolaka landila kuzyeta kukondwa nsuka. Ntangu bawu vwandaka telama, bawu kumaka retrograde. Bawu zolaka landila na kusala konso nkokila; vwandaka tunga tiya ya malu-malu konso nkokila; vwandaka landila kaka na kukwenda na ntuala. Mpe ya kele

yina beto fwana kusala. Yina Luther vwandaka mbote; ya vwandaka samu na kilumbu ya Luther. Yina Wesley vwandaka mbote; yina vwandaka kilumbu ya Wesley. Yina busantu kuzwaka, yina vwandaka mbote; yina vwandaka kilumbu ya bawu. Beto ke na kuzinga na kilumbu yankaka. Ntangu yayi beto ke—beto ke na kulandila na kukwenda na ntwala. Mpe ya ke vwanda na kilumbu na manima ya beto, ya ke kwiza kaka mutindu mosi. Kasi beto tambula na Nsemo na yina Nsemo kele awa.

⁸⁰ Ntangu yayi, mpe mu me tala yayi, ti, na kati kuna malongi yayi me kuma, kima ya ntete beno zaba, tii ya me kota na nkonga ya ba-isme, kuna ba-Romain me ndima. Ntangu yayi, kimfumu ya Rome, kubanda na bilumbu ya—ya Rome ntete ba bakaka yawu mpe nungaka yinza ya Bantu ya makanda kuna na Grèce, na manima ya kubwa ya Alexandre le Grand, vwandaka yinsi yina me zabana mingi na yinza; bantu ya Rome, nsungi ya Bantu ya makanda. Daniel tubaka yawu, na kati ya vision. Beto ke tubila yawu, na—na mwa minuti fioti. Kasi ya ke vwandaka ntangu nionso na luyalu na zulu ya yinza; ba-Romain.

⁸¹ Mpe na manima beto ke tala kuna, na yina, ti bawu salaka organisation na dibuundu. Nkonga ya bantu me vukana, pene 606, mpe ba me bokila bawu mosi, “batata ya ntete,” batata ya dibuundu. Bankonga ya bantu ke kwizaka kintwadi mpe ke salaka lukutakanu ya yina bawu fwana sala, mpe bawu ke sala organisation.

⁸² Mpe ti mu zonza awa, bankundi ya munu ya Muklisto ya luzolo, bawu nyonso zole ba-Protestant mpe Bakatolika. Mpe ntangu yayi, mu banza ti mu kele na bankundi ya Katolika kele ya kuvwanda awa; mu ke na kutuba yayi ve samu na kunyongisa beno. Na yina, beno vingila kaka mwa ntangu fyoti, mpe beto ke kuzwa dyaka Branham Tabernacle na kati ya yawu, beno me mona, kaka minuti. Beto fwana longa kaka Nsangu ya mbote mutindu Yawu me vwanda awa. Ata kisika... Jean tubaka, “Disoka me tulama na nsimbulu ya yinti,” bika ti mingenzi kulemuka konso kisika yina bawu zola. Ya kieleka. Yandi fwana zenga bayinti mpe nionso yina.

⁸³ Kasi, beno tala, na kati kuna bawu salaka organisation na dibuundu ya ntete. Mpe bawu vukanaka mpe bongisaka dibuundu ya ntete, yina ba bokilaka dibuundu ya yinza ya muvimba, to dibuundu ya Katolika na Rome. Mpe Katolika ke tuba ti yandi kele “dibuundu ya mama.” Mpe ya kele kaka kieleka. Ya kele dibuundu ya mama ya organisation. Kieleka. Ya kele mbala ya ntete, na disolo nyonso ya yinza, ti dibuundu me salaka ntete organisation; yina me vwandaka ntete ve, kubanda malu-malu ya ntangu.

⁸⁴ Na bilumbu ya Israel, bawu vwandaka ve—bawu vwandaka ve organisation. Bawu vwandaka dikanda, organisation ve. Mpe

bawu . . . Yesu Klisto salaka ata mbala mosi ve organisation na dibuundu. Ata mosi ve ya bantumwa kubongisaka dibuundu. Mpe ata mbala mosi ve na yisi, na manima ya bansungi tatu to yiya na manima ya bawu, bawu salaka organisation na dibuundu. Mu zola beno kunata disolo mpe beno tula musapi ya beno na . . . Beno lakisa munu kisika ya kele. Mpe mu me tanga Josèphe mpe bantu nyonso ya kulutila nene ya masolo yina kele na beto na yinza bubu yayi, ti mu zaba, samu ti mu fwana vwanda ya kieleka. Mu ke salaka nsamunu yayi na ntuala ya mafunda ya bantu; beno fwana vutuka mpe kumonisa yina beno ke na kuzonzila. Ya kele kieleka. Ya me vwandaka ata fioti ve na organisation. Mpe ve . . .

⁸⁵ Mpe Santu Pierre tungaka ata fioti ve dibuundu ya Catholique. Mu zola disolo mosi, to mwa kitini mosi ya Masonuku. Santu Pierre vwandaka muntu yina kwelaka. Beno ke tuba ti yandi vwandaka pape. Yandi zolaka vwanda pape ve. Pierre vwandaka muntu yina kwelaka. Biblia ke tuba, “Mama ya kento ya yandi vwandaka ya kulala na—na fièvre, mpe Yesu belusaka yandi.” Mpe mutindu mu me zaba, Santu Pierre vwandaka ata fioti ve na Rome. Mpe ya kele na ata disolo yina ke lakisa ti yandi vwandaka na Rome. Mpe ya kele foti.

⁸⁶ Kasi bawu kubongisaka mpe vwandaka kintwadi dibuundu ya kubokila dibuundu ya yinza ya muvimba. Kuna bawu salaka kisambu ya yinza ya muvimba. Bawu vwandaka na ngwisani ya kulunga; muntu nionso zolaka vwanda kintwadi, muntu nionso kutuba kima mutindu mosi. Ba tubaka kisambu mosi.

⁸⁷ Mpe ba me sala nkonga ya Masonuku, ba me baka yawu na kati ya Biblia, mingi na kati ya yawu, mpe yankaka bawu mosi me sala. Ya kele ve na kombelo yina ba me zonza kilumbu mosi na Babuku nyonso ya santu ya Biblia; ve “mbote na nge Maria,” kima ya mutindu yina ve. Ya ke vwandaka ntangu nionso ya kuswaswana, samu na yawu, bisika nionso na Masonuku. Ata mbala mosi ve ti ya vwandaka, na ntangu mosi. Mpe kana beno tala kisika mosi, beno kele na bweso ya kukwiza mbasi na nkokila mpe kusungika munu. Ya kele kuna ve, kisika mosi ve; beno nata nganga-Nzambi ya beno to pasteur ya beno. Ya kele ve na kisika, na kati ya Masonuku, kisika ba zonzaka yawu.

⁸⁸ Mwa buku kaka, ya ba-Maccabée, yina kubwelamaka na kati ya Yayi, yina kele ve ntwadusulu ya kimpeve; bima yina ba tulaka na kati ya Yayi, to yina ba basisaka na Yayi. Biblia *yayi* kele kaka Mosi. . . . Ba me zaba yawu na mibandisi ya ntete, to konso muntu ya dibuundu ya ntete ya bantu ya masolo, to konso ntangu ya ba-Juif ya Orthodoxe, mpe zabaka kima mosi ve kasi Biblia yayi beto ke na yawu bubu yayi.

⁸⁹ Ntangu yayi, na yina, na kati ya yina, beno kuwa mbote ntangu yayi. Ntangu yayi beno banza ti bantu ya Katolika ke na kuzwa kuseka? Kaka ntangu fyoti, beno me mona.

⁹⁰ Ntangu yayi, na yina bawu bongisaka dibuundu ya Katolika, mpe bawu bandaka kutalisa mpasi, ti bawu zolaka...Beno zolaka sala muntu nionso, bisika nionso, dibuundu mpe luyalu, kuvukanaka kintwadi, mpe nataka na Rome ya mimpani na Rome ya pape. Na nzonzolo yankaka, na misiku ya mimpani, bawu ndimaka Buklisto na mutindu ya bawu mosi. Beno me mona? Ba lendaka ve kubakula samu na yinki muntu yina ke telama mpe ke sambila kima mosi ve. Bawu vwandaka mimpani, na yawu bawu katulaka kaka Venus mpe tulaka Marie; bawu katulaka Jupiter, tulaka Pierre; mutindu mosi ya kiteki samu na kusambila. Ntangu yayi, mpe bawu vwandaka sambila na ntuala ya yawu. Mpe bawu salaka kisambu ya bantu nyonso, tubaka yawu na Latin samu ti yawu kubwa ata mbala mosi ve, mpe nyonso yina, bawu ke tubaka ntangu nyonso mutindu mosi.

⁹¹ Mpe beno lenda solula ve to kusolola na nganga-Nzambi ya Katolika, to muntu ya Katolika ve, na zulu ya lufulu ya Biblia.

⁹² Muntu mosi vwandaka, nganga-Nzambi yayi ya ntwenia awa, vwandaka na yinzo ya munu ntama mingi ve. Yandi tubaka, “Beno ba-Protestant, beno ke tangaka Biblia mpe beno ke vwandaka na yinzo. Beto ba-Catholique ke kwendaka na yinzo-Nzambi mpe ke sambilaka.”

Mu tubaka, “Kasi yinki? Yawu yina. Ntangu yayi pesa munu mvutu na yawu.”

Yandi tubaka, “Nzambi kele na kati ya dibuundu ya Yandi.”

⁹³ Mu tubaka, “Yandi...Ata mosi ve ya Masonuku me tuba mutindu yina.” Mu tubaka, “Nzambi kele na kati ya Ndinga ya Yandi. Yandi tubaka, ‘Bika ti konso ndinga ya muntu kuvwanda luvunu, mpe ya Munu ya kieleka.’”

⁹⁴ Yandi tubaka, “Beno banza ve ti nkonga ya muvimba ya bantu, ke vukana kintwadi, ke vwanda na kiyeka ya kulutula kaka muntu mosi?”

⁹⁵ Mu tubaka, “Ve. Kana muntu mosi kele na luzolo ya Nzambi, yandi kele na Kieleka.” Yandi siamisaka yawu ntangu nionso.

⁹⁶ Mutindu na Josaphat na Michée, baleso beto vwandaka kaka na kilumbu yankaka yina, Lumingu me luta, ntangu Michée kwendaka kuna. Mpe milongi bankama yiya ya kutelama, na kutubaka, “Mata! Mfumu kele na nge. Mata! Mfumu kele na nge.”

Josaphat tubaka, “Ya kele dyaka ve na mosi yankaka awa?”

Yandi tubaka, “Ya kele na Michée, kasi mu ke yinaka yandi.”

Yandi tubaka, “Beto kuwa yina yandi me tuba.”

Yandi tubaka, “Mata, kasi mu me mona Israel ya kumwangana mutindu mameme.”

Yandi tubaka, “Mu tubaka na nge ve?” Beno me mona?

97 Na yawu, nani vwandaka ya kusungama, kuna? Ntangu baprofete nkama yiya yina ba longaka vwandaka ya kutelama na ntwala ya muntu, mpe dyaka mwa exalté mosi ya kutelama na manima kuna vwandaka na kieleka. Ya kele kieleka. Ya kele kieleka. Yandi salaka yawu. Yandi vwandaka na kieleka. Yandi bulaka mbata na yinwa mpe bulaka, na zulu ya yawu, kasi yandi vwandaka na kieleka.

98 Na yawu ya ke sala dyambu ve bantu yikwa ke tuba *yayi*, to bantu yikwa ke tuba *yina*, ya kele MUTINDU ME TUBA MFUMU. Ya kele kieleka. Beno fwana telama beno mosi, bambala mingi, ntangu beno ke telama na zulu ya Ndinga ya Nzambi, kasi beno vwanda ya kukwikama na yina Mfumu me tuba.

99 Ntangu yayi, bawu bongisaka dibuundu yayi, nzutu ya nene, dibuundu ya Katolika, yina kele kuyala na bansambulu nyonso, bubu yayi, na kitezo ya Miklisto, ya kele Bukatolika. Kasi bawu ke tuba, “Beno kele na nsatu ve . . . Beto ve . . .”

100 Beno ke tuba, “Wapi kisika beno ke kuzwa ‘kudya ve musuni’? Wapi kisika beno ke kuzwa ‘nganga-Nzambi ya kukwela ve’? Wapi kisika beno ke kuzwa yayi?”

101 Yandi tubaka, “Beto ke longaka ve Biblia.” Yandi tubaka, “Dibuundu kele ndinga. Ata ti yina Biblia me tuba; ya kele yina dibuundu ke tuba.”

102 Kasi Nzambi tubaka, “Bika ti konso ndinga ya muntu kuvwanda luvunu, mpe ya Munu kuvwanda kieleka.” Ntangu yayi beno fwana sala nsodolo ya beno.

103 Ntangu yayi, Nicolaïsme yango kumaka malongi, mpe na manima kumaka kutalisa mpasi. Ntangu yayi, awa ya me kuma awa na bilumbu ya nsuka. Na manima me kwiza omasis, na nzila ya bansungi ya mudidi mpe bampasi; na manima ya vwandaka na mwa kukulumuka fioti, na kusungika ya ntete, yina vwandaka Martin Luther. Martin Luther teleminaka dibuundu ya Katolika, samu na yina yandi kwendaka kuna mpe bakaka kominyo yango . . .

Mpe bawu tubaka, “Yayi kele nzutu ya Klisto.”

104 Yandi tubaka, “Ya kele ve nzutu ya Klisto. Ya kele galette. Kaka yina.”

105 Bawu ke kwikila ti ya kele kominyo ya santu, yina, “*Kominyo ya santu* zola kutuba ‘Mpeve-Santu.’ Mpe ntangu beno ke baka yawu, beno ke baka Mpeve-Santu na kati ya nzutu ya beno.” Mpe yina kele luvunu.

Mpeve-Santu kele mbotika ya Mpeve.

106 Ve, “Ntangu Kilumbu ya Pantekote kusalamaka, nganga-nzambi mosi kwizaka mpe pesaka bawu kominyo ya santu, galette na ludimi ya bawu.” To ve, “Mulongi mosi me belama mpe

me losa mwa maza na zulu ya bawu, mpe me ningisa diboko ya bawu,” to. Ve, tata.

¹⁰⁷ “Kasi makelele katukaka na mazulu mutindu mupepe ya ngolo, yina fulukaka na yinzo nionso kisika bawu vwandaka.” Ya kele Masonuku. Ya kele yina kele kieleka. Ya kele yina salamaka na Dibuundu yango, mpe ya kele yina salamaka ntangu Nsemo ke na kulezima na kilumbu yayi. Ya kele kisika Nsemo ke lutaka kuna; mpe awa kele kisika Nsemo ke talana awa.

¹⁰⁸ Ntangu yayi kana Masonuku nyonso, mu ke na kutangaka, kele na kyuvu, beno tula kaka yawu na zulu . . . Mu ke pesa beno kisika ya kele, beno me mona, na kati ya Masonuku. Mbote mingi. Kieleka, kaka na mwa ntangu mutindu yayi. . . Bantangu yankaka, ntangu beto ke kwendaka na ntuala na Yawu, beto ke bakaka basabala mpe bangonda. Kaka Masonuku nionso, beno landa yawu, beno vwanda na bantu na Biblia ya bawu. Kasi, kana ba ke yufula Yawu, beno bika mu zaba. Mbote mingi.

¹⁰⁹ Na yina, Martin Luther. Na yina, na manima ya Martin Luther, me kwiza John Wesley.

¹¹⁰ Martin Luther basikaka na catechisme, bima mingi. Yandi basikaka na mbotika, yandi basikaka na kupesaka mbotika ya butatu, mbotika ya butatu yina ba longaka ata mbala mosi ve na kati ya Biblia, ba longaka ata mbala mosi ve na Biblia. Ya vwandaka ata fioti ve na muntu yina bakaka mbotika ya butatu, na kati ya Biblia. Kana ya kele mutindu yina, beno kwiza lakisa munu kisika ya kele. Ya kele kuna ve.

¹¹¹ Mutindu kaka ba pesaka bawu kisalu ya kubotama, vwandaka, “Kwenda mpe longa bayinsi nyonso,” Yandi tubaka na manima kuna, “mpe botika bawu na Nkumbu,” ve na nkumbu, “na Nkumbu; Tata, Mwana, Mpeve-Santu.” Mpe bilandi balukaka mpe botikaka muntu nionso na Nkumbu ya “Yesu Klisto,” mpe, tumaka ti kana muntu mosi me bakaka mbotika na mutindu yankaka, zolaka kwiza mpe kuzwa dyaka mbotika ntete bawu kuzwa Mpeve-Santu. Mpe awa me basika dibuundu ya Katolika . . .

¹¹² Beno tula kisika mosi na Biblia kisika muntu mosi botamaka na nkumbu ya “Tata, Mwana, Mpeve-Santu.” Ya kele kieleka ya mpamba, mutindu yina ve? Kilumbu ya sambanu na nkokila kele kyuvu na nkokila, mu ke kuzwa yawu, beto ke kuzwa yawu samu na kusungika yawu. Mbote mingi. Mbote mingi. Mu zola muntu nyonso yina lenda lakisa munu kisika mosi kisika muntu mosi botamaka ntete na nkumbu ya “Tata, Mwana, Mpeve-Santu,” mu ke basika na chaire mpe ke tuba ti mu kele muntu ya luvunu. Mpe muntu mosi bakaka mbotika na mutindu yankaka, yandi fwana kwisa baka diaka mbotika na Nkumbu ya “Yesu Klisto,” samu na kuzwa Mpeve-Santu. Ya kele kieleka. Ya kele yina Biblia ke tuba.

113 Ntangu yayi, beno me mona, beto ke baka dibanza na kisika ya Kieleka. Ntangu yayi beno tala na Masonuku. Beno tuba ve, ti, “Mbote, Mpangi Branham me tuba.” Beno tala na Masonuku ntangu yayi. Beno baka concordance ya beno mpe beno tala yawu. Mpe kuna na ntangu. . .

114 Beno tala, mosi na mosi ya bansungi yango ya dibuundu vwandaka na Nkumbu ya Yandi, tii ya lutilaka na nsungi ya dibuundu yayi ya mudidi.

115 Mpe, beno tala, yina ke fwanana kuna na—na dibuundu ya ba-Orthodoxe. Ntangu nsungi ya mudidi vwandaka na zulu, ya ba-Juif, vwandaka ntangu Achab, na kiti na manima—na manima ya ntinu ya nene na ntwala ya yandi; mpe na ntwala ya yina, Israel nionso vwandaka na mutindu mosi ya kitoko. Mpe Achab kwizaka mutindu mukwikidi ya ndilu, nkadulu ya tiya ve madidi ve, mpe kwendaka kuna mpe kwelaka mwa mwana ya kento ya ntinu yayi, Jézabel, yina vwandaka musambidi biteki, mpe kotisaka yandi, mpe nataka bisambu ya biteki na Israel. Beno ke bambuka moyo na yawu ve? Kifwanukusu ya kitoko mingi.

116 Ntangu ba-Protestant me kwelana na ba-Romain, ba me kotisa diaka kusambila biteki na Buklisto, na nsungi ya mpimpa; kieleka—kieleka, landila géographie.

117 Ntangu yayi beno tala mbote ntangu ya ke basika na lweka yayi. Beno tala yinki? Kiyingilu samu na Mpeve-Santu; galette. Kiyingilu samu na mbotika ya maza na Nkumbu ya Yesu Klisto; Tata, Mwana, Mpeve-Santu. Ba me yingisa nionso. Mu lenda baka mpe kusiamisa na nzila ya Masonuku; kiyingilu na manima ya kiyingilu.

118 Mpe Martin Luther wisanaka na yawu. John Wesley me kwiza kaka na kima mutindu mosi, mpe me wisana na yawu. Ya me vwandaka ntete ve na muntu, na kati ya Biblia, yina ba mwangisaka mwa maza. Ya me vwandaka ntete ve na kima mutindu. Ya vwandaka ve na kima ya mutindu yina na kati ya Biblia, lutumu ve to lutumu samu na yawu ata fyoti ve, kasi beno ke pesa muswa na yawu. Ya kele kieleka. Beno ke pesa muswa na yawu. Bawu ke basika mpe ke kuzwa mwa mungwa yayi mpe ke mwangisa yawu na beno. Samu na yinki? Dibuundu ya Katolika kubandaka yawu, mpe beno fukama na yawu. Kieleka.

119 Muntu mosi tubaka, kilumbu yankaka yina, yandi tubaka, “Nge kele ve. . . Nge, nge kele kaka muntu ya Katolika ve. Nge kele. . .”

120 Mu tubaka, “Ve, mpangi. Mu kele Protestant. Mu ke tula ntembe na kima yango.” Ya kele kieleka. Mutindu longi ya Nsangu ya mbote, na bana ya Nzambi mutindu ba-candidat ya munu awa, samu na Mazulu, mpe mu ke longa samu na bawu mpe ke vwanda na ntwala ya bawu mutindu mulongisi na bidimbu mpe mambu ya ngitukulu, Mu ke vwanda muntu ya

luvunu kana mu telema ve samu na yina vwandaka kieleka. Mu tubaka, “Yinga, tata. Mu ke telama, kana ya ke kufwa munu. Mu ke kwenda. Mu—mu ke longa kaka yina kele Biblia.”

¹²¹ Mpe mu zola, na ntangu mosi, samu na kuzonzila Yawu na muntu mosi, beno me mona; ti yandi vwanda pape ya Rome, to archevêque, to nyonso yina yandi kele. Beno me mona? Yinga, tata. Ya kele kieleka. Kana mu kele na foti, beno kwiza lakisa munu. Ntangu yayi, mu ke na kifu ve, samu mu ke na kutanga Masonuku. Beno . . . Mu ke baka buku ya beno ve. Yayi kele Buku ya masonuku, kaka *awa*.

¹²² Ntangu yayi, na yina, beno tala, bawu bandaka na kubasika na misiku nyonso yayi.

Ntangu yayi, na bilumbu ya nsuka, ya ke vwanda na ntangu ya bampasi.

¹²³ Ntangu yayi beto kele, na kutala, Apocalypse kapu ya 13 ntangu yayi, na kubanda. Ntangu yayi kana beno tala, na yisi na kapu awa, yandi tubaka, “Mu talaka, mpe tala, Mwana-dimeme mosi telemaka na zulu ya mongo ya Sinai . . .” Ve, beno lemvolila munu, mu kele na nzila ya yimbi, kapu ya 14. kapu 13:

. . . Mu telemaka na zulu ya bazelo ya mubu, mpe monaka kibulu kubasika na mubu, na kuvwandaka na bayintu sambwadi mpe mampoko kumi, mpe na zulu ya bibongo kumi bayimpu, mpe na—na zulu ya bayintu ya yandi nkumbu ya kuvweza.

¹²⁴ Yinki kele *kuvwenza?* Ya kele “kuseka, kusawula, kuzonzila.” Ntangu yayi beno tala mbote, yandi vwandaka “na bayintu sambwadi, bibongo kumi.” Mpe beno tala mbote ntangu yandi “basikaka na mubu.” Ntangu yayi Apocalypse 17, beno bayina ke na kusonikaka yawu, 17:15, tubaka ti—ti *bamaza* vwandaka monisa “bantu mingi mpe nkonga ya bantu mingi.” Na yawu *niama* yayi ke talisa “ngolo, ngolo ya kukondwa busantu.” “Kibulu ya mambu yina me basika na bantu, mpe yandi telemaka na zulu ya bazelo ya mubu. Mpe mu monaka kibulu . . .”

Mpe kibulu yina mu monaka vwandaka mutindu . . . yingo, . . . makulu ya yandi vwandaka makulu ya ulusu, . . . yinwa ya yandi . . . yinwa ya nkosi: mpe dalango pesaka yandi ngolo ya yandi, mpe . . . kitu, mpe lutumu ya nene.

¹²⁵ “Dalango!” Beto kele na bima zole ya mfunu ntangu yayi. Beno tala mbote kibulu yayi. Ya vwandaka na bantu yiya ya kuswaswana na kati ya yawu.

¹²⁶ Mpe kana beno baka Daniel 7, beno yina ke sonika yawu, Daniel 7. Daniel monaka vision yina mosi, bankama nana ya bamvula na ntwala ya yayi, monaka vision. Yandi monaka bibulu

yango, kukabwana, mosi na yankaka, na mbandukulu ya Bantu ya makanda ke twadisa.

¹²⁷ Mpe bawu yayi awa, Jean ke na kumona yawu, mpe nsuka ya Bantu ya makanda ke na kuyala, bibulu nyonso yiya yango vwandaka monikisa na mosi. Bampeve ya yimbi mosi yina ya ntama, bampeve ya yimbi yina vwandaka na kimfumu ya ba-Romain, kuna, mpe ba-Grecs, mpe nyonso yina, kuna na kati ya nsungi ya Bantu ya makanda, me kulumuka mpe nyonso me kutana na kibulu mosi. Beto ke tala yandi, mbala mosi, mpe beto ke mona nani yandi kele. Kieleka. Nyonso yina, nsemo, nkosi, nyonso yina, dalango. Bantu yikwa zaba yina dalango kele? *Dalango* ke talisa “Rome.” Yinga.

¹²⁸ Beto—beto tanga yawu. Ti, ya kele mutindu ya kyuvu na dibanza ya beno. Pesa munu Apocalypse kapu 12, kaka ntangu fyoti awa. Beto tala awa, Apocalypse 12. Beno tala ntangu yayi.

Mpe kidimbu ya nene monikaka na mazulu; kento mosi . . .

¹²⁹ Yinki *kento* ke monikisa? “dibuundu.” Yayi kele—yayi kele kento ya makwela awa. Yayi kele dibuundu, dibuundu ya kieleka.

. . . kento ya kulwata mwini, mpe ngonda na yisi ya makulu ya yandi, . . .

¹³⁰ Beno tala, ngonda na yisi ya yandi. . . “Mwini na yintu ya yandi, ngonda na yisi ya makulu ya yandi.” *Mwini* vwandaka “nsungi ya lemvo.” Mpe *ngonda* vwandaka “nsungi ya musiku.” *Kento* vwandaka “dibuundu ya Orthodoxe,” mpe yandi vwandaka ya kutelama na zulu ya musiku. Musiku vwandaka luta, samu ti musiku vwandaka kivudi ya bima ya mbote yina ke na kwiza. Ya kele kieleka? Ngonda kele kaka kivudi, ya mwini ke na kulakisaka na ngonda (ya kele kieleka?), ke na kusalaka ngonda. Mpe musiku vwandaka na yisi ya makulu ya yandi; yandi zingaka na kilumbu yina. Mpe beno tala mutindu yandi vwandaka ya kulwata awa ntangu yayi.

. . . mpe na yisi ya makulu ya yandi, mpe na zulu ya yintu ya yandi yimpu ya bambwetete kumi na zole: (Ba me byadisa dibuundu na Malongi ya bantumwa kumi na zole, beno me mona.)

Mpe yandi na kuvwandaka na kivumu bokaka, na mpasi ya kubuta, . . . na mpasi ya kubuta. (Yina vwandaka dibuundu ya Orthodoxe. Beno tala mbote.)

Mpe—mpe ya monikaka na kidimbu yankaka na mazulu; mpe tala dalango ya nene ya mbwaki, yina vwandaka na bayintu sambwadi, . . . (beno me mona, beno bumba sambwadi yina na dibanza ntangu yayi, “bayintu sambwadi,” ntangu nyonso) . . . bayintu

sambwadi. . . bibongo kumi, mpe bayimpu sambwadi na zulu ya bayintu ya yandi.

Ntangu yayi, mpe mukila ya yandi bendaka kitini mosi na zulu ya tatu ya bambwetete ya mazulu, mpe losaka yawu na ntoto: mpe dalango kutelamaka na ntuala ya kento yina vwandaka ya kukubama samu na kubuta, samu na kufwa mwana ya yandi ntangu kaka yandi zolaka butuka. (Beno tala!)

Mpe yandi butaka mwana ya bakala, yandi yina zolaka yala bayinsi nyonso na yinti ya kisengo: mpe ba zangulaka mwana na Nzambi, mpe na kiti ya yandi ya kimfumu.

¹³¹ Dibuundu ya ba-Orthodoxe ya kutelama kuna; mwini vwandaka sema; Malongi ya bantumwa kumi na zole. Mbote mingi. Na ngonda na yisi ya makulu ya yandi, musiku, kivudi ya bima yina ke kwisa; Nsemo ya Nsangu ya mbote ke na kulezima ntangu yayi, musiku ke na kubwa ntangu Mwini kubasikaka.

¹³² “Yandi vwandaka na mpasi ya kubuta, mpe yandi butaka Mwana ya Bakala,” yina vwandaka Klisto Yesu, “mpe ba zangulaka Yandi na Nzambi. Kasi na ntangu. . .” Yawu yayi. “Na ntangu dalango, yina vwandaka dyabulu, monaka kento ya kukubama samu na kuvuluswa, yandi telamaka kaka pene ya yandi samu na kufwa Mwana ya Yandi ntangu kaka Yandi zolaka butuka.”

¹³³ Mpe ntangu Yesu kubutukaka, Kimfumu ya Rome kusalaka nsamunu, samu na kufwa bana nyonso ya bamvula zole, tii na yisi, samu na kufwa Klisto Yesu. Mpe Nzambi katulaka mika na meso ya yandi, mpe katulaka Yandi na Egypte mpe bumbaka Yandi, mutindu Yandi salaka na Moise mutindu mosi.

¹³⁴ Ya kele na dalango ya mbwaki yina, dyabulu. Wapi kisika kele kiti ya yandi? Na. . . Na Russie ve; na Rome! Mpe yandi tubaka, “Dyabulu pesaka yandi kiti ya yandi mpe lutumu ya yandi, dalango ya mbwaki,” Russie ve.

¹³⁵ Mu ke kuwa balongi ya nene kutuba, “Bantu ya Russie kele mbeni ya Klisto.”

¹³⁶ Na yina, Russe me kuzwa kima ve ya kusala na mbeni ya Klisto. Ya kele communisme. Mutindu ya luvunu ya ba-Protestant mpe malongi ya Katolika me basisa communisme. Ya kele samu na yina Russie me basisa bawu kuna, samu bawu vwandaka na mbongo nionso. Mpe bisambu nionso tubaka na basantu ya bawu, na yina bawu tungaka bayinzo ya kulutila nene, mpe kuzwaka bimvwama nyonso ya bantu, mpe bakulaka yawu mutindu yina. Mpe bawu monaka ti bawu vwandaka zinga ya kuswaswana ve, mpe bawu vwandaka ya kuswaswana ve na bayankaka nionso ya yinza, mpe bawu losaka yawu mpe salaka communisme.

¹³⁷ Ntangu yayi kana beno pesa munu mpimpa mosi dyaka, kana Nzambi sala, Mu ke siamisa na beno ti communisme ke na kusalaka mbala mosi na maboko ya Nzambi ya Ngolo nyonso, samu na kubebisa ngolo ya Rome. . . Mpe, beno bambuka moyo, mu ke tuba yayi mutindu profete ya Nzambi, luyalu ya Russie ke losa bombe atomique mutindu mosi na Mbanza ya Vatican mpe ke bebisa yawu na ngunga mosi. MUTINDU ME TUBA MFUMU. Mpe Biblia ke tuba ti Nzambi bakaka bantu ya ntima ya yimbi mpe tulaka bawu na maboko ya Yandi, mpe ba vwandaka bisadilu na maboko ya Yandi, “samu na kulungisa luzolo ya Yandi,” mpe samu na kuvutula na yandi kieleka yina yandi kwizaka na yandi. Ya kele kieleka. Ya kele Ndinga.

¹³⁸ Mpangi, beno ke na kubakula kaka ve mutindu mayela ya bima yayi kele! Beno bambuka moyo, Yesu Klisto tubaka ti mbeni ya Klisto ke vwanda pene-pene mingi ti ya lenda vuna musolami ya kieleka. Yandi tubaka, “Ntangu yayi kubika muntu ve kukotisa nge.” Yandi tubaka, “Beno vwanda ve mutindu mimpani, beno tuba kisambu ya beno kuna mpe kuna, ‘Mbote na nge Marie, nge me sakumuka, nge me fuluka na lemvo, mpe nge me sakumuka. . .’” Yandi tubaka, “Kuvwanda ve mutindu mimpani, na kusadilaka bandinga ya mpamba.” Yandi tubaka, “Mpe beno bokila muntu mosi ve ‘tata,’ na manima ya ntoto yayi, to, to. . . mutindu beno kele na Tata mosi, mpe yina kele na Mazulu.”

¹³⁹ Kasi beno ke baluka, beno ke zimbana yawu ve, beno ke sala yawu kaka, samu ya kele ya kuzabana mingi. Dyabulu ke vwanaka ntangu nyonso na kima ya kuzabana. Ya ke vwanaka ntangu nyonso, kubanda mbandukulu, “nkadulu ya nsambulu.” Caïn vwanaka na kima mutindu mosi. Awa kele mpepe ya yandi yina ke na kutambulaka kaka awa, na nzila ya mbeni ya Klisto; mpe awa kwizaka Abel, muntu yina ba kufwaka, mpe. Ya kele kieleka. Beno tala, mpe ntangu yayi beno tala.

¹⁴⁰ Bibulu yayi nionso, kuna, vukanaka na kibulu mosi awa, yina ba vwanaka bokila “dalango ya mbwaki,” dyabulu.

Ntangu yayi beto banda na nzila ya 15 ya kapu 13.

¹⁴¹ Beno me mona ntangu yayi ti *Rome* yina vwanaka—vwandaka “kiti ya Satana.” Kibulu ya yintu na bibongo kumi kutelamaka na lweka ya Mwana, Klisto Mwana, samu na kufwa Yandi kaka na ntangu kaka Yandi zolaka butuka. Nani salaka yawu? Hérode, Rome; ke vwanaka ntangu nyonso. Beto ke kota na Daniel, mbala mosi, kana beto kele na ntangu mingi, mpe Mfumu kusadisa beto, mpe beto ke mona.

¹⁴² Mutindu bisika nyonso na Masonuku, kubanda mbandukulu ya Bantu ya makanda, tii na mbandukulu ya Genèse, Mu lenda talisa ti Babybone bandaka na Genèse mpe ke suka na Apocalypse. Bawu bandaka kuna na Nimrod, mwana ya Cham, na nzila ya kusambila biteki, samu na kunata biteki, samu na

kusambila biteki. Mpe ya me landila, mpe, ya kele ya mayele mingi na bilumbu ya nsuka ti ya ke baka na nkumbu ya Buklisto, mpe, kaka, kusambila ya biteki!

¹⁴³ Ya vwandaka ve Santu ya nene Paul, na ba-Thessalonicien ya Zole, beto tuba? Beto tanga yawu, na ntwala beto kwenda ntama. Ba-Thessalonicien ya Zole, kapu ya zole, mpe beno tala yina Paul tubaka awa. Yandi monaka yawu na Kimpeve, na ntwala ya kukwisa na kilumbu yina beto ke na kuzinga.

¹⁴⁴ Mbote, oh, mutindu kilumbu yina beto ke na kuzinga, mpimpa na kati ya yina beto ke na kuzinga, mpe babakala mpe bakento yina ke zingaka na kutala awa na mpimpa ya mimpani mpe zaba yawu ve. Wapi—wapi kyadi! Wapi mutindu kilumbu yina. . .

¹⁴⁵ Paul tubaka, “Kilumbu yina zolaka kwiza ve, kana ti ya kwiza ntete bantu mingi, mpe muntu ya disumu kumonisama.” Ntangu yayi beno tala mbote, yandi ke tuba ti yandi kele muntu. Ya kele kieleka? Paul tubaka, “Yandi vwandaka muntu ya disumu, yina ke telema na zulu ya nionso yina ba me bokila Nzambi, na yawu yandi yina ba ke sambilaka mutindu Nzambi.” Muntu, kusambilaka mutindu Nzambi; muntu yina ba ke tula awa mutindu muntu ya kusambila. Mpe yandi tubaka, “Kilumbu yina lenda kwiza ve kana ya ntete bantu mingi kumanga.” Yinki ya kele? Nkadulu ya mwa-tiya ya dibuundu. Mbote mingi.

¹⁴⁶ Beno kuwa. Beno bika mu tangila beno yawu, kana beno me zola, ba-Thessalonicien ya Zole. Mbote mingi. Kana mu lenda baka kisika ya mbote ntangu yayi, na kubanda, na yawu beto ke tanga mingi ve. “Ti muntu ve kuvuna beno,” nzila ya 3, ya Zole ya Thessalonicien, kapu 2.

Ti muntu ve kuvuna beno na konso mutindu: samu ti kilumbu yango ke kwiza ve, kana ti bantu kumanga kwisa ntete, (Nsungi ya Dibuundu ya Laodicée ntangu yayi) . . . mpe muntu yina, (m-u-n-t-u, mosi) . . . muntu ya disumu ke monisama, mwana ya nzimbani; (na kisika, na kisika ya Mwana ya Nzambi), mwana ya nzimbani;

Yandi yina ke manga (yandi mosi) mpe ke kukizangula yandi mosi na zulu ya nionso yina ba me bokila Nzambi, na yina ba ke sambila yandi mutindu Nzambi; ti yandi mutindu Nzambi kele ya kuvwanda na kati ya tempelo ya Nzambi, na kutalisaka yandi mosi ti yandi kele Nzambi. (Na kundimaka bamfunguna!)

¹⁴⁷ Beno tuba na munu ve, nkundi ya munu ya Katolika! Wapi mutindu ya kele, beno ke tuba ti beno “ke kwikilaka ve na yawu kasi na makwela mosi; dibuundu ya Catholique ke simbaka na nzila ya makwela mosi.” Kana beno kele ve na mbongo, ya kele mbote mingi. Kasi bika mu tuba na beno, kaka awa na kati ya bantu ya munu mosi; ntwenya mosi ya kento ya kuvwanda

kaka awa, mama ya kuvwanda awa, mpe papa, mpe; mpe kento yankaka awa na mwa mwana yayi ya bakala. Mwana ya kento kwelaka mwana ya bakala ya Protestant; bawu kabwanaka mpe basikaka. Na yawu kuna, kima ya ntete beno zaba, mwana ya kento zolaka kwela mwana ya bakala ya Katolika; mpe yandi zolaka kwenda mpe kufuta mbongo mingi, mpe kuvutuka, mpe, “Yandi kukwelanaka ve na mwana ya bakala ya Protestant yayi, na kisika ya ntete.” Awa keke Howard, bantu ya munu mosi . . .

¹⁴⁸ Mbote, kaka awa na zulu . . . Mu ke bokila nkumbu yango ve. Yandi keke—yandi keke na mwana ya kento, mpe mwana ya kento keke na bamvula pene makumi zole na sambanu. Bakala ya yandi, yandi bikaka yandi kuna na Milltown, mpe kwendaka mbangu mpe kwelaka muntu ya Katolika. Mpe ntangu yayi bawu tubaka, “Yandi fwana basika na dibuundu.” Na yawu bawu futaka mbongo mingi, samu na kuvutuka mpe “kusoba dyaka yandi na mwense,” mpe kukwelisa yandi dyaka na muntu yayi. Buzoba! Beno soba yandi na mwense? Yandi me kwelana, na meso ya Nzambi, mpe ke na kuzinga na pité. Ya keke kaka kieleka. Ya keke MUTINDU ME TUBA MFUMU, mpe. Kieleka.

¹⁴⁹ Wapi nsoni! “Beno futa mbongo mingi.” Ya keke samu na yina mabuundu nyonso yayi ya nene mpe balukolo keke ya kutunga. Ya keke mutindu. Yinza ya muvimba . . . Beno zaba yawu ve, awa na Etats-Unis. Beno fwana landa munu na bayinsi ya nzenza, mbala mosi, mpe beno ke tala. Yinga, tata. Beno kwenda kuna, mpangi, kisika bawu keke na diboko ya zulu.

¹⁵⁰ Mu lenda pesa beno kifwanisu mosi, ya kieleka, Mpangi Kopp bakaka yawu kaka, mpe fidisaka yawu na munu, mulongi ya Protestant, Mulongi ya Mpeve-Santu, ya kuvwanda na bala-bala, ya kuvimba pene-pene mutindu *yayi*, yandi na kento ya yandi, mpe mwa mwana mosi ya kento, me vimba mutindu yina; samu bawu longaka Yesu Klisto, ngolo ya mvumbukulu, mpe bantu lenda kuzwa mpulusu mpe kuzwa Mpeve-Santu. Ba kufwaka bawu na bala-bala, mpe ba zolaka ve kubika bawu yokama, mpe ba losaka mante na zulu ya bawu, bilumbu na manima ya bilumbu. Ya keke kieleka.

¹⁵¹ Kaka kuna kisika Mpangi Osborn zolaka vwanda ya kubumba, na yisi ya minduki, samu na kubasisa bawu. Bawu kwendaka kuna, mpe mosi . . . nkonga ya banganga-Nzambi kwizaka kintwadi mpe kufwaka ntwenya ya bakala yayi. Mpe kento vwandaka kaka na bebe. Mpe bawu vwandaka tambula na bala-bala mutindu yina, ba vwandaka sala kusalu ya kunata yandi kuna na ntoni, samu na kuzika yandi. Mpe mama yayi vwandaka tambula, na bébé, vwandaka dila, na manima ya bakala ya yandi ya kufwa. Mpe bantu talaka kuna na nela, bantu ya ntima ya kusungama, yandi tubaka, “Kana ya keke mutindu dibuundu ya Katolika ke kuwaka, beto ke manga yawu.” Mpe landaka, na mafunda, kuna na bala-bala. Mpangi

Osborn vwandaka na reveil kuna, ti bawu lendaka basisa yandi ve na yinsi. Ya vwandaka na bantu mingi. Ya kele kaka kieleka.

¹⁵² Oh, luvunu yina! Mu zaba ti ya kele kifwani ya yimbi. Beno vwanda kaka swi, bankundi ya Catholique, beto ke kota na mpasi na lweka yankaka, na mwa ntangu fioti. Mbote mingi. Beno tala.

¹⁵³ Ntangu yayi beto ke kulumuka, beno tala, mwa fyoti na mantwala. Bika mu nata yayi na beno. Ntangu yankaka mu lenda vwanda na ntangu, mu ke diaka na minuti makumi tatu. Beno tala na bukebi nionso. Ntangu yayi beto vutuka, muntu nyonso yina ke tangaka, kaka na dibanza ya beno, minuti mosi, samu na kifwani na yintu. Ntangu. . .

¹⁵⁴ Konso mukwikidi ya Orthodoxe awa zaba ti kimfumu ya Bantu ya makanda bandaka na Ntinu Nebucadnetsar. Ya kele kieleka? Mukwikidi nyonso ya Orthodoxe zaba yawu. Mpe Ntinu Nebucadnetsar vwandaka na vision, mpe Daniel pesaka yandi ntendulu. Ya kieleka? Mpe ya vwandaka yintu ya wolo, yina vwandaka Babylone; ya zole vwandaka ba-Mede mpe ba-Perse; yina vwandaka landa vwandaka kimfumu ya Grèce; na manima Kimfumu ya Rome. Mpe na nsuka ya Kimfumu ya Rome, Yesu Klisto vwandaka Ditadi yina katukaka na mongo, kukondwa diboko, yina balukaka mpe bukaka kiteki (ya kieleka?), mpe fikaka ntoto. Muntu nionso me zaba yawu. Mukwikidi nionso me zaba yawu.

¹⁵⁵ Mpe mutindu yina, na bilumbu ya nsuka, ntangu bawu pasulaka bimfumu yayi mingi ya kuswaswana, mpe nyonso yina, na misapi ya makulu, ya vwandaka na kisengo mpe ntoto. Mpe ya zola kutuba, profete tubaka, “Na yina nge me mona kisengo mpe ntoto ke vukana ve kintwadi, to yina mpe ke vukana ve mosi na yankaka.” Kasi ba ke vukisa bankuna yina, ba ke meka. . . Na nzonzolo yankaka, bawu ke kwelana na bawu, na kumekaka na kusansa bana ya bawu mpe kubuka, samu na bangolo, mutindu yina. Mpe beno zaba ti ya kele kieleka. Kasi, kusimba, ya me kuma, mpe beno bantu me kota na yawu, “Oh,” beno tuba, “ya kele mbote.”

¹⁵⁶ Beno tala Stevenson yayi, nionso yina nkumbu ya yandi kele, awa na zulu. Ntangu yayi yandi. . . na zulu awa. Yinki kele nkumbu ya yandi? Mu me zimbana kaka. . . Bakala mosi awa, yina ke na kusalaka mambu nyonso yayi awa. [Dibuundu me tuba nkumbu mosi—Mu.] Yinga. Oh, la la!

¹⁵⁷ Etats-Unis yayi me pola tii na mikwa. Yinga, tata. Mu lenda talisa na beno ntangu kaka. . . Kento yayi awa, kuna na Apocalypse 12, ntangu. . . Ba zangulaka Mwana ya yandi na kuvwanda na Kiti ya kimfumu ya Nzambi, mpe, ntangu yawu salaka, kento yina kimaka na ntoto ya kuyuma, kisika ba vwanda keba yandi na bamvula funda mosi na bankama zole na makumi sambanu, na kilumbu ya kieleka ya Plymouth Rock, ya kieleka,

kisika dibuundu kwizaka awa samu na kimpwanza ya nsambulu, mpe yandi vwandisaka awa.

¹⁵⁸ Mpe beto ke landila na kutanga kuna na kapu 13 ya Apocalypse awa, mpe kutala awa na nzila ya 15. Mpe, ntangu yayi, kaka muniti mosi, mu zola vutuka na ntwala ya yawu, mpe beto ke mona awa kisika ti Yandi vwandaka ya kutelama awa na bamubu. Ntangu yayi kana mu lenda kuzwa kaka kisika, kisika, nzila ya 11.

Mpe mu talaka kibulu yankaka kubasika na ntoto; (ve ke basika na—na maza) . . .

¹⁵⁹ “Na ntoto.” Na yina, bantu ya kifuluka mpe nkonga ya bantu mingi kele maza, na yina yayi kele kisika bantu vwandaka ve, Etats-Unis.

. . . mpe yandi vwandaka na bibongo zole mutindu mwana-dimeme, . . .

¹⁶⁰ “Bibongo zole *mutindu* mwana-dimeme,” mwana-dimeme ve. Yinki ya kele? Ya kele buffalo ya beto ya Amerika. Kieleka. Beno me mona, yandi yayi, “bibongo zole mutindu mwana-dimeme.” Kasi na yina yinki yandi salaka? Yandi kuzwaka kimpwanza ya nsambulu, ntete; yandi salaka mutindu mwana-dimeme, yandi zonzaka mutindu mwana-dimeme. Kasi, beno bambuka moyo, yandi kumaka ata fioti ve dimeme ya kiboba. Yandi vwandaka mwana-dimeme. Yinsi yayi kele kaka na bamvula nkama mosi na makumi tanu, beno zaba, kaka mwana-dimeme.

. . . mpe na manima yandi tubaka mutindu dalango.

Mpe yandi vwandaka talisa ngolo nyonso ya kibulu ya ntete vwandaka na yawu na ntwala ya yandi, (dalango ya mbwaki), mpe salaka nyonso yina vwandaka na zulu ya ntoto, yina zingaka na zulu ya ntoto, samu na kusambila. . . kibulu, mputa ya yandi ya kufwa kubelukaka. (Beno tala!)

Mpe—mpe yandi ke salaka mambu ya nene ya ngitukulu, ti ke na kusala yandi tiya kukulumuka na mazulu. . . (Bombe atomique, mpe ya hydrogène; yinsi ya mayele mingi, yinsi ya ngangu, mpe nionso yina, ke vunaka bayinsi na nzila ya bima yayi.)

¹⁶¹ Etats-Unis yayi ke kwiza na ntangu yina dibuundu mpe luyalu ke vukana kintwadi. Mpe Protestant mpe Katolika ke vukisa bima ya bawu kintwadi, samu na kunwanisa communisme. Mpe ya kele kieleka kusakana na maboko ya yina Nzambi tubaka kaka awa.

¹⁶² Mpe beno ba-Protestant yina kele kuna, ke wakana ya kulala, ke tanga zulunale ya zola na kisika ya Biblia ya beno! Kuna, ke na kuyenga-yenga kisika mosi kuna, na mwa feti mosi, na kisika ya lukutakanu ya bisambu kisika mosi kuna; ke na

kuswana mosi na yankaka na mwa bima ya fyoti ya ntama yina ke mfunu mingi ve mutindu *yayi*. [Mpangi Branham me bula misapi ya yandi—Mu.] Beno fwana vwanda ya kufukama kisika mosi, kana beno zaba yina Seko zola kutuba.

¹⁶³ Beno tala, ntangu, Ntinu Nebucadnetsar, na mbandukulu ntama kuna, ntangu nsungi ya Bantu ya makanda kusalamaka. Beto tala mbote mutindu ya kotaka. Mpe mutindu ya kotaka, beno ke mona ti ya ke suka mutindu mosi. Beto zaba ti ya kele na mbandukulu ya ntangu ya lemvo samu na Bantu ya makanda, mpe nsuka ya ntangu. Ya kele kieleka?

¹⁶⁴ Ntangu yayi beno tala mbote, ntangu Ntinu Nebucadnetsar. . . ntangu ba fidisaka Daniel kuna, profete ya mayela, ntangu bayankaka nionso ya ba-Juif vwandaka na mutindu ya kukikulumusa mpe vwandaka fukimina ba-Romain. . . to na bantu ya Babylone. Kasi ya vwandaka na bantu tatu, bantu yiya; tatu (Schadrac, Méschac mpe Abed-Nego), mpe Daniel, bayina bakaka lukanu na kati ya ntima ya bawu ba ke sadila Nzambi. Mpe na yina ntangu ba losaka Schadrac, mpe nionso yina, na. . . Mpe Daniel kumaka muntu ya nene, mpe na ntwala ya Ntinu Nebucadnetsar mpe Belschatsar, mpe nionso yina. Ntangu yandi kumaka muntu ya nene, ntangu yayi beno tala mbote, Ntinu Nebucadnetsar salaka kifwani ya wolo mpe tulaka yawu na bilanga, mpe tubaka ti muntu nionso ke zola kufukama na ntwala ya kiteki yina.

¹⁶⁵ Beno me talaka ntete ve kukondwa kuzaba diambu ya yawu, ya nani kifwani yina ba salaka? Ya vwandaka Daniel, kifwani ya muntu. Mpe yandi tubaka ve, “bampeve ya banzambi,” mimpani? Mpe mutindu beto kele bubu yayi, beto kele na tatu to yiya ya yawu. “Bampeve ya banzambi ke zingaka na kati ya yandi,” mpe bawu salaka kifwani ya Daniel. Mpe yandi tubaka, “Bayina nionso ke fukama ve na ntwala ya kiteki yina, ba ke losa bawu na dibulu ya tiya.” Beno tala, Daniel me kota na kusalu na ntangu yina. Beno me bakula yina mu zola tuba? “Mpe muntu nionso yina zolaka ve kufukama na ntwala ya kiteki yina ba zolaka zenga yandi na bitini-bitini, to ba zolaka losa yandi na dibulu ya bankosi, to kuyokama na dibulu ya tiya, to kima mosi, kitumbu.”

¹⁶⁶ Ya ke mutindu yina nsungi ya Bantu ya makanda bandaka, na mutindu ya kusambila ya mimpani, na mpasi samu bawu fukama na yawu. Mpe Biblia me zabisa na ntwala ti ya ke suka mutindu mosi, “Muntu ya santu,” Yesu Klisto; kifwanusu ya Yandi, samu na kusambila yawu, mpe nyonso yina.

¹⁶⁷ Beno ke bambuka moyo, na buku ya bambangi ya Foxe, bawu vwandaka tula diboko na ntwala ya bawu, vwandaka tula ngombe na zulu na diboko mosi na yankaka mutindu yina, mpe zolaka tuba. . . Kana nge ke manga ve, nge ke manga ve malongi ya ba-Protestant, mpe nge ke kuma Catholique mpe “nge ke beze

kulunsi yayi.” Ba zolaka kupusa ngombe mosi na ndambu mosi, ngombe mosi na ndambu yankaka, mpe ba vwandaka panza bawu. Ba vwandaka yoka bawu na bapoto. Bawu salaka nyonso. Mu vwandaka na bakatakombe ya ntama; mu zaba yina mu ke na kuzonzila. Mpe, beno me mona, ti, ya kele kieleka. Mpe kuna bawu ke pema. Mpe beno tala mutindu bawu lutilaka na bilumbu yango ya bambangi na ntwala ya Martin Luther. Landila Biblia, mpe.

¹⁶⁸ Ntangu yayi beno tala mbote dyaka ntangu yayi. Ntangu yayi mu zola beno kubakula kima ya nene. Wapi mutindu kimfumu ya Babylone bukaka? Nkokila mosi ntangu bawu kwendaka kuna mpe bakaka banzungu ya santu ya Nzambi, mpe bandaka na kunwa vinu na kati ya yawu; bandaka na kuzwa ntangu mosi ya nene, mpe kuzwa nkonga ya bakento kuna, makangu, mpe vwanda bina mpe vwanda kuzwa ntangu ya nene. Ya kele kieleka? Na ntangu yina ya vwandaka na bisono mosi kwisaka na kibaka, “MENE, MENE, TEKEL, UPHARSIN.” Ya keleka? Mpe bawu kwendaka mpe bakaka ba-Chaldéen ya bawu, babakala ya bawu ya mayele mingi, bamambele ya dibuundu yina kele tiya ve madidi ve, mpe ata mosi ve na kati ya bawu zolaka tanga yawu. Ya kele kieleka.

¹⁶⁹ Kasi bawu vwandaka na muntu kuna yina lendaka tanga bandinga yina me zabana ve, alleluia, lendaka tendula yawu. Beno me mona yina mu zola kutuba? Yandi lenda tendula bandinga yina me zabana ve. Ya kele mutindu ya basikaka.

¹⁷⁰ Ya kele mutindu yina yandi ke basika ntangu yayi, na ngolo ya Mpeve-Santu na zulu ya bantu yina kele ya kufulukuka na mbotika ya Mpeve-Santu, bayina kele na ngolo mpe bidimbu mpe mambu ya ngitukulu. Ya ke na Dibuundu ya Bantu ya makanda. Ya ke na ndambu bikanaka.

¹⁷¹ Tala mutindu ya bandaka, tala mutindu ya ke suka, kieleka, kufukimina mpe kutumama na ngolo na nsambulu yina kele ndambu ya bumpani. Mpe Nzambi ke salaka na kati ya ngunga ya mpasi mpe ke na kusunika na bandinga ya kuzabana ve, mpe muntu ke tendula yawu. Yandi lenda tendula. Yandi zabaka ve ndinga yina; muntu yankaka ve zabaka yawu. Kasi yandi vwandaka na Mpeve-Santu mosi, yina salaka yandi kutendula yawu, kele Mpeve-Santu mosi na kati ya Dibuundu bubu yayi.

¹⁷² Beno ke bokila Yawu “bufanatiki.” Mu ke ndima ti ba kele na mingi ya yawu. Kasi, mpangi, ya kele na mosi ya kieleka kuna, mpe. Ya keleka, mosi yina kele ya kieleka, dyaka. Diabulu ke tinda beno bakumekula nionso yandi lendaka, kaka na nzila, samu na kukotisa beno na muvusu. Mpe kana beno ke banza diaka ve na Nzambi ti beno kulumuka mpe beno tanga Biblia ya beno, mpe beno sambila mpe beno lomba na Nzambi, na yina ya ke talisa ti beno me sepela ve na moyo ya beno.

173 Beno kwenda kaka kuna mpe beno tuba, “Nzambi, mu ke kipe ve bakumeka yikwa ya ntama Nge me tula kuna. Mu ke mona Biblia ya Nge me tuba yawu, mpe mu me baka lukanu!” Ya kieleka. “Nge silaka yawu na munu, nkuna ya Abraham.”

174 Nzambi bokilaka beno, beno ke kwiza na Yawu; kasi kana beno kele ve, Mu ke kipe ve wapi mutindu beno kele musambidi, beno me kwenda; nyonso yina, beno lenda kwisa ve. Muntu ve lenda, kana ti Yandi bokila beno. Mpe Yandi zola ve ti mosi kufwa, kasi mingi ya beno ke sala samu ti beno ke kipe Yawu mingi ve.

175 Mpe beno ke kwenda kuna mpe beno ke mona kima mosi ke monana mutindu mwa muntu ya fanatiki, mwa kivudi mosi ya fioti, “Mbote, Docteur *Kingandi* tubaka *yayi-mpe-yina*, mpe nyonso yina.” Mpe na yina beno ke kwenda bisika nyonso mpe ke vweza Mpeve-Santu, beno zaba ti ya kele kieleka, mpe ba ke lemvokila yawu ata fioti ve.

176 Beno ke mona na mwa minuti fioti yina kidimbu ya diabulu kele, yina—yina kidimbu ya dyabulu kele, kidimbu ya kibulu. “Muntu nyonso yina ke tuba yimbi ya Mpeve-Santu, ke lemvokila yandi ata mbala mosi ve, na yinza yayi, to na yinza yina ke kwiza.” Beno tala mbote dibuundu yango ya ntete, yina bawu salaka. Beno tala mbote, na zulu ya yayi, dibuundu ya zole! Beno lenda tula beno mosi kidimbu na Kimfumu ya Nzambi, mpe na kati ya dyabulu; kuna na kisika ya kele “lemvo ve, na yinza yayi, to yandi yina ke kwiza.” Kieleka. Na yawu, beno sala keba, beno tambula na buzitu nyonso. Beno sala keba na yina beno ke sala, samu ti beno zaba ve yina ke salama.

177 Ntangu yayi, beto ke mona nionso yayi ntangu yayi ke na kulandana. Mu me kuzwa baminuti makumi zole. Mu zola ti beno baka na munu kapu ya 17, Apocalypse, samu na kumanisa kaka na mwa ntangu fioti. Ntangu yayi beto ke kota na diambu ya ngudi. Beno kuwa na bukebi. Beno tanga na munu. Beno zibula Biblia ya beno mpe beno kubama samu na kutanga. Yayi fwana tula yawu kidimbu.

178 Beno bambuka moyo, ya kele na bidimbu zole; mosi kele kumanga lukwikilu, yankaka yina kele Mpeve-Santu. Mosi kele kidimbu ya dyabulu.

179 Beno bambuka moyo, mu me tuba yayi, ti dibuundu ya Katolika ya ntete. . . Ntangu yayi, bantu ya Catholique, beno vwanda na luzitu na mwa minuti fioti. Dibundu ya Katolika ya ntete salaka dibanza ya bawu mosi na yina me tala kima mosi. Ba vwandaka na malongi ya luvunu, ya kominyo ya santu, ya kubaka galette na kisika ya mbotika ya Mpeve.

180 Ba-Protestant me ndima kupesa mbote, to me sala nsilulu; bawu zole kele na kifu, landila Ndinga ya Nzambi. *Yayi* kele dinaka. Bawu ke kwiza mpe ke botika, “Tata, Mwana, Mpeve-Santu,” na yina ya kele ve ata mbala mosi ti muntu mosi ba me

botikaka mutindu yina; yina kele kieleka mbotika ya mimpani, ya Katolika. Mpe bawu ke ndima yawu, mpe ke tuba, “Beno ba-Protestant ke fukimina mbotika ya beto.”

Mu tubaka, “Samu na yinki beno ke sala yawu?”

¹⁸¹ Yandi tubaka, “Dibuundu ya Katolika kele na ngolo ya kusoba Masonuku nyonso yina bawu zola.”

Mu tubaka, “Ya kele luvunu.”

Yandi tubaka, “Samu na yinki nge ke fukama na yawu kuna?”

¹⁸² Ah, na yina beno ke kanga yinwa. Munu ve! Mu ke kwikilaka na yawu ve. Yayi kele Ndinga ya Nzambi. Ya kele kieleka. Kana bantu zola kulanda, ba fwana kwenda bawu mosi. Mu fwana tuba Kieleka. Ya kieleka.

¹⁸³ Beno tala, na yina bawu basikaka na nyonso yayi yankaka, dibuundu, vukana na katekisima ya bawu ya ntama mpe bima nyonso yina kuna. Wapi nkonga ya bulawu mpe ya buzoba! Mpe ya me mena byazi ya bantu ya kukondwa kukwikama, mpe ya madidi ya misiku . . .

¹⁸⁴ Ya kele dyabulu, na mbandukulu. Mpe mu lenda talisa na beno ti Biblia me tuba awa, “Yinza ya muvimba kukiyufulaka na manima ya ngolo ya kibulu yayi; yina vwandaka, yina kele ntete ve, kele.” Wapi mutindu ya lendaka vwanda, “vwandaka, mpe kele ve?” Yandi tubaka, “Yinza ya muvimba kukiyufulaka samu na yawu.”

¹⁸⁵ Ntangu Rome ya mimpani kumaka Rome ya pape, yawu ke suka ata fioti ve. Systeme ya Romanisme me suka; ntangu ntinu ya malu-malu ke kota, yandi ke vwanda kaka na ntumunu ya malu-malu. Kasi ntangu bawu kwizaka na Rome ya mimpani, na dibuundu ya Katolika, na nzila ya bupaapa, ya ke sukaka ata mbala mosi ve. Kana pape mosi me kufwa, bawu ke vwanda mosi na yankaka; pape mosi ke kufwa, bawu ke vwanda mosi na yankaka. “Kibulu yina vwandaka, yina kele ntete ve, kele; yina kele ntete ve, yina kele; yina . . . mpe ke kota na zimbani.” **MUTINDU ME TUBA MPEVE-SANTU**, na nzila ya Masonuku.

¹⁸⁶ Ntangu yayi, beno kuwa. “Mpe kuna kwizaka mosi . . .” Beno nyonso tala mbote ntangu yayi, kapu ya 17.

Mpe kuna kwizaka na munu mosi ya bawanzio sambwadi yina vwandaka na bambungu sambwadi, (yina kele bambungu ya nsuka, yina me tiamuka), mpe me tuba na munu, na kutubaka . . . Mata awa; mpe mu ke lakisa . . . nge lufundusu ya kento ya kindumba ya nene yina vwandaka na zulu ya bamaza mingi:

¹⁸⁷ Beno tala mbote Apocalypse 12. Ya vwandaka kento ya mwense. Yandi vwandaka mama ya kieleka. Mutindu kitoko yandi telemaka!

188 Kasi awa kele na mosi yina ba ke bokila ndumba, “w-e-h-o-e-l-e,” zola kutuba con- . . . Yinki ya kele? Beto tanga yayi. . . to kufyongonina yawu.

189 Beno lemvokila munu. Beno dasuka mingi; na kubanzaka ti mu me kuzwa baminuti kumi na tanu. Mu ke vwanda na ngunga yankaka na yina, na yina beno vwanda swi. [Dibuundu me tuba, “Amen.”—Mu.]

190 Beno tala. Mbote mingi. Beno tala, beto talisa yawu na ba-kufyongonina. Yandi kele kento ya yimbi. Yinki kele kento ya kindumba? Mu ke zolaka ve kutuba ndinga, kasi ya me sonama awa na kati ya Biblia. Ya kele kento yina ke tubaka ti yandi kele kento ya mbote, mpe ke salaka kindumba na babakala yankaka. Ntangu yayi, kana kento ke monikisa dibuundu, na yina ya kele dibuundu yina ke tubaka ti ya kele Muklisto, mpe kusala pité na bima yankaka. Ya kele kieleka?

191 “Mpe yandi kele ya kuvwanda na zulu ya bamaza mingi; nkonga ya bantu mingi mpe nkonga ya bantu mingi.” Beno tanga. . . na kutala nzila ya 15 mpe beno ke mona yawu, beno me mona. To, 17, kuna. Beto ke kuma na yawu na minuti mosi. “Kento yina kele ya kuvwanda na zulu ya bamaza mingi; kento ya ndumba.” Wapi kima! Ntangu yayi kana beto vwandaka na bilumbu na manima ya bilumbu, mu zolaka baka kento yango mpe kutala yandi na Caïn na Nkwizulu ya Mfumu Yesu, mpe me monisa na beno ti yandi vwandaka ya ntete na kusala organisation na dibuundu. Yandi kele mama ya organisation. Beno tala mbote, “Mpe kento yina kele ya kuvwanda na zulu ya bamaza mingi. Na zulu, ya kuvwanda na zulu ya bamaza mingi.”

Ntangu yayi nzila ya 2.

. . .yandi yina (b-a-n-t-i-n-u) bantinu ya ntoto me sala kindumba, mpe bantu ya ntoto me lawuka vinu ya yandi ya kindumba.

192 Na nzonzolo yankaka, yandi ke tuba kele dibuundu ya Muklisto; ya zulu, ya kitoko. Beno tala mbote mutindu yandi kele ya kulwata, na mwa ntangu fyoti, na misanga mpe matadi ya wolo. Bawu ke tuba, “Nani kele mutindu yandi?”

193 Mpe yandi vwandaka na mbungu na diboko ya yandi, ya kufuluka na “vinu ya yandi ya kindumba,” mvindu ya yandi, malongi ya yandi ti yandi vwandaka sala bantinu, oh, kaka samu na kusala mwa kisambu mpe “kusambila beno na kombelo,” mpe bima nyonso yayi. Yawu yina. Yawu yina. Yawu yina Ndinga ya Nzambi mu ke tanga. Beno tala, “Na yawu yandi nataka munu na . . .” Ntangu yayi beto mona, mpe salaka vinu. . . Ya kele kieleka, nzila ya 3 ntangu yayi. Mbote mingi.

Mpe yandi nataka munu na kimpeve na ntoto ya kuyuma: mpe mu monaka kento ya kuvwanda na zulu ya nti- . . .kibulu ya mbwaki, . . . (“Mbwaki,” ya bimvwama, dibuundu ya ntalu na yinza.)

194 Ba ke boka awa, “Nani lenda sala mvita na yandi?” Ya kele na muntu mosi na yinza, kaka muntu mosi na yinza, na yinza ya muvimba, yina kele na ngolo mutindu vision ya Ntinu Nebucadnetsar vwandaka. Misapi ya makulu ya bawu ke basika na konso . . . Nsinga yango ya kisengo ya Rome ke basisa na bayinsi nyonso na yinza. Ya kele ve na muntu yankaka na yinza yina kele na muswa ya kutuba na yina pape ya Rome kele na yawu. Ntwadisi ya yinsi Eisenhower lenda tuba na Etats-Unis, mpe ya kele musiku; kasi ya kele na bayinsi yankaka yina yandi lenda zonza, mpe ya kele kima mosi ve. Kasi bukifumu ya Katolika lenda zonza na Rome, mpe yinsi nyonso ke boka na yawu. Ya kele kieleka. Yandi yayi. Ntangu yayi beto ke mona kisika yandi kele, mpe beno mona kana ya kele yandi to ve, beno mona kana yandi ke talana awa kaka. Mbote mingi.

*. . . mpe mu monaka kento ya kuvwanda na zulu
ya kibulu ya mbwaki, (mvwama), ya kufuluka na
bankumbu ya kuvwenza, . . .*

195 Mbotika ya luvunu; bantu ya luvunu; vwandaka twadisa bantu ya kufwa meso, vwandaka tuba na bawu ti bawu lenda kwisa kaka na yinzo-Nzambi, sala mfunguna ya bawu, mpe nionso yina, sala “Mbote na Maria,” sala kibansa. Kukondwa kuzaba! Buzoba! Mu ke mona ve mutindu bantu, mabanza ya mbote ya bantu, lendaka kwikila mambu ya mutindu yayi.

. . . yina vwandaka na bayintu sambwadi. . .

196 Beno bawu yayi dyaka, mpeve ya yimbi mosi yayi yina kele bisika nyonso, dalango ya mbwaki, kibulu mpe nyonso, kele na “bayintu sambwadi; bibongo kumi.”

197 “Mpe kento,” kento, ntangu yayi, dibuundu. Ntangu yayi, *kibulu* kele “ngolo” yandi vwandaka, dibuundu ya Katolika ya Rome, kasi ngolo ya Katolika ya Rome. Kasi, awa kele dibuundu ke na kuzonzaka ntangu yayi.

*Mpe ba vwandaka lwata bilele ya pulupe mpe ya
mbwaki, mpe ya kukangama na wolo mpe matadi ya
ntalu mpe matadi ya ntalu, yina vwandaka na mbungu
ya wolo na diboko ya yandi ya kufuluka na busafu mpe
mvindu ya kindumba ya yandi:*

198 Yandi yayi; ya kele na dibuundu mosi, beno zaba. Mutindu yina ve? Yandi zolaka vwanda kuna; yandi ke talana kuna. Beno landila kaka na kutanga mpe beto ke mona nani yandi kele.

*Mpe na zulu ya yintu ya yandi ba sonikaka nkumbu,
DINSWEKI, BABYLONE YA NENE, MAMA YA
BAKENTO YA KINDUMBA, BUSAFU YA NTOTO.*

199 Mbote mingi, ba-Protestant, awa kele kisika yina beno ke kangama. Beno ke ndima ti yandi kele kento ya kindumba, kasi yandi vwandaka “MAMA” (ya yinki, ya bana?) “YA BAKENTO YA KINDUMBA.” Ya ke vwanda *bakento*, ya kieleka? Ya

ke vwanda na mabuundu kuna, ya kele kieleka? Yandi kele dibuundu ya mama kuna, mutindu yina ve? Wapi kisika Martin Luther katukaka? Bukatolika. Wapi kisika yimpu nyonso yayi me basika? Bukatolika, na kunataka malongi ya bawu mosi, mpe beno ke fukama na yawu.

²⁰⁰ Ntangu yayi, kento ya yimbi na Jeffersonville lenda basisa mwana-kento ya mbote, ya kieleka, ya mwense, ya kele kieleka, mpe yandi lenda kwenda mbala mosi kana yandi zola. Mpe mutindu mosi salaka dibuundu ya ba-Lutherien, ba-Methodiste, ba-Baptiste, mpe ba-Presbytérien, mpe nyonso yankaka yina; bawu kwendaka mbala mosi, ntangu—ntangu bantu ya bawu vwandaka kuna vwandaka longa Nsangu ya mbote na bawu. Kasi ntangu yayi ba ke kwenda na bisika ya bansaka, na television, ke kunwa makaya, ke sala bima nionso yankaka, (beno zaba ti ya kele kieleka!), beno vwanda na yinzo na Lumingu. Yinki ya kele? Samu ti kento ya beno ya kindumba ke na kusalaka mutindu mama ya yandi. Ya kele kieleka. Ya kele kieleka.

²⁰¹ Ntangu yayi beto mona kisika ntinta kele. Biblia ke tuba ti yandi vwandaka “MAMA YA BAKENTO YA KINDUMBA.” Mpe muntu nyonso zaba ti ya vwandaka Rome ya mimpani, to Mama Rome ya pape, dibuundu ya Katolika. Na mwa ntangu fioti, mu ke talisa na beno, kutula yandi na kisika ya yandi na ntoto, kaka kieleka kisika yandi ke vwanda. Ya kieleka. Kisika yandi kele mpe nani yandi kele, Biblia me tuba yawu. Munu ve; Biblia! Mpe yandi tubaka ti yandi butaka mabuundu mingi ya bana ya bakento na manima ya yandi. Mbote mingi, ntangu yayi, ba-Methodiste, mpe ba-Baptiste, mpe ba-Luthérien, mpe nionso yina, beno me mona kisika beno me kuma, “MAMA YA BAKENTO YA KINDUMBA.” Bawu vwandaka zinga mbote mingi, kasi ntangu Nsemo bandaka na kulezima . . .

²⁰² Ya kele mutindu nkonga ya ba-wagon na été. Beno pelisa mwinda, na nzila kisika mpese ke na kudia mususu ya ntama ya disangu to kima yankaka mutindu yina, mpe beno pelisa mwinda mpe beno ke mona bawu mutindu ba ke sosa na kubumbama na nswalu nionso ba lendaka.

²⁰³ Beno ke longa Nsangu ya mbote, to mbotika ya Mpeve-Santu, na mabuundu mingi ya ntama ya misiku, ya kukondwa busantu; mpe beno tala bawu mbote, “Beto ke kwikilaka ve na kima ya mutindu yina. Mu ke kwikilaka ve na . . .” Samu na yinki? Beno zaba yina beno kele, na mbandukulu. Ya kele kieleka. Ya kele kaka kieleka.

²⁰⁴ Mu ke tuba kima mosi ve samu na kutelemina dibuundu ya beno; mpangi, beno kele na bantu na kati kuna yina kele mayaka. Mu ke tuba kima mosi ve samu na kutelemina bantu ya Catholique. Mu zola bantu ya Katolika mutindu mosi mu zola Branham Tabernacle. Ya kele beno ve, nkundi ya munu, mu ke na

kumeka na kuboka. Ya kele beno ve, Methodiste mpe Baptiste, mpe Branham Tabernacle. Ya kele beno ve ti mu ke na kuboka. Ya kele disumu na yina beno ke na kubika dyabulu kutula na zulu ya beno! Kaka samu ti beno ke kwendaka na dibuundu, beno ke banza ti beno kele ya kuvuuka.

Yesu tubaka, “Kana ti muntu kubutama na maza mpe Mpeve, yandi ke vwanda ve na ndwenga na kukota na Kimfumu.” Mpe ntangu beno ke kuzwa mbotika ya Mpeve-Santu, “Bidimbu yayi ke landa bayina ke kwikila.” Ya kele mbala mosi na dipeka, mpangi-bakala. To, ya kele ve kima na mapeka, ya kele mbala mosi na Biblia. Yesu tubaka ata mbala mosi ve, “Ya lenda vwanda ti bidimbu yayi ke landa ndambu.” Yandi tubaka, “Bawu ke landa bawu.”

Oh, bawu ke tuba, “Ntangu yayi, mu ke kwikila ti ya vwandaka samu na bantumwa. Mu ke kwikila ti ya kele kaka na kimvuka mosi ya bantumwa, mpe ya vwandaka kuna na mbandukulu.”

²⁰⁵ Mpe leso ya kieleka beto talaka mazono na nkokila, “Yandi vwandaka na bambwetete sambwadi na diboko ya Yandi,” mpe konso mbwetete zolaka pesama na konso nsungi ya dibuundu samu na Nsemo, kieleka; kaka mutindu ntumwa ya kele *kuna*, ya kele na ntumwa *kuna*, mpe ntumwa mosi *kuna*, mpe ntumwa mosi *kuna*; “yina vwandaka Bampeve sambwadi,” na mbandukulu ya leso ya beto, “ya kutelama na ntwala ya Nzambi, samu na kufidisamaka na Bansungi Sambwadi ya Dibuundu.”

²⁰⁶ Oh, mpangi, beno lendaka tambula na mwa malongi ya ba-Baptiste to ya ba-Methodiste, mpe kuluta na yawu; kasi beno tala yawu, na meso ya Biblia, mbala mosi. Ya kele kieleka. Amen. Mu ke kumitala musambidi malu-malu yayi. Amen. Yinga, tata. Beno tala. Mpangi, beno bawu yayi. Ya kele kubula; kasi ke bula beno fimbu, ya ke sala beno mbote ve . . .

²⁰⁷ Mama, yina vwandaka kuna na manima, yandi vwandaka sala munu kubaka mafuta ya ricin. Beto vwandaka bana ya fioti. Beto fwana kudya dimpa ya masangu mpe madeso, konso kilumbu na sabala, mpe na Lumingu, mpe. Na bala-bala nyonso, mu fwana baka nkisi mingi. Kilumbu ya sambanu na nkokila, yandi ke sala munu ntangu nyonso kuzwa mafuta ya ricin. Mpe na Kilumbu ya sambanu na nkokila mu ke simba mbombo ya munu, mutindu *yayi*, mu ke tuba yayi ve samu na kusakana. Mu ke simba mbombo ya munu, mpe mu ke tuba, “Mama, mu lenda baka yawu ve. Ya ke pesa munu kimbevo mingi.”

Yandi tubaka, “Kana ya me pesa nge kimbevo ve, ya ke sala nge mbote ve.”

²⁰⁸ *Yayi* kele mutindu yina. Yangidisa beno! Ya ke lomba ba-orgue ya nge—ya nge yina ke na kusala mbote, samu beno kumina Nsangu ya mbote ya muvimba.

209 Ba-Luthérien kwisaka na kunungisama. Mbote, bawu vwandaka kaka. . . Bongisaka yawu nyonso, “Yinga, tata, beto kele dibuundu!”

210 John Wesley monaka kusantisama. Yandi tubaka, “Mu ke mona ti ya kele mutindu yankaka.” Mpe yandi tubaka, “Ya kele nyonso ya kulunga, Luther, kasi yayi kele yawu.” Yinki yandi vwandaka? Luther vwandaka mbwetete ya nsungi ya yandi, kasi awa kele Wesley. Mbote mingi.

211 Ntangu yayi, na yina, ba-Luthérien kwendaka na manima na dibaya, samu bawu zimbanaka. . . ve. . . Ntangu yayi, nyonso ve. . . Mu zola kutuba dibuundu ya Luther. Bantu ya Luther kele dyaka na bantu ya mbote, ya kifuluka na Mpeve-Santu. Ya kele kieleka. Kasi ntangu yayi bawu nyonso vutukaka na dibuundu, na nsungi yango. Mbote mingi.

Awa me kwiza Wesley. Yandi bakaka bawu na kati ya nsungi ya yandi.

212 Na yina, kima ya ntete beno zaba, kwizaka. . . Na manima ya nsungi ya Wesley, kwizaka ba-Pentecotiste. Mpe bawu kuzwaka Mpeve-Santu, na kuzonzaka na bandinga.

213 Oh, ba-Méthodiste, mpe ba-Nazaréen, mpe bantu ya Sainteté, ke tuba, “Oh, ya kele dyabulu.” Mpe beno me mona yina beno salaka? Beno me vweza Mpeve-Santu. Mpe beno me mona kisika beno kele bubu yayi? Ya kele kieleka. Beno, kieleka yina beno salaka. Kieleka, beno salaka. Mpe beno kondwaka na kutambula na kati ya Nsemo.

214 Mpe ntangu yayi beno ba-Pentecotiste me kuzwa tiya mingi ve madidi ve, Nsungi ya Dibuundu ya Laodicée yayi, tii Nzambi ke lobola beno na yinwa ya Yandi. Kieleka. Ya kele kaka kieleka.

215 Beno ke tuba, “Nge ke kwikilaka na kuzonza na bandinga?” Yinga, tata. “Nge me zonzaka ntete na bandinga?” Yinga, tata. Mu ke kumisa Nzambi samu na yawu. Yinga, tata. Mu zonzaka na bandinga, bambala mingi. Mpe mu ke kwikila ti ya kele Ngolo ya Nzambi. Yinga. Mu ke kwikilaka ve na kimbangi ya kieleka, ntangu yayi, kele kutuba na bandinga. Kasi mu ke kwikila ti ya kele na Ngolo ya Nzambi yina ke salaka beno kuzonza na bandinga, bidimbu mpe mambu ya ngitukulu na kulanda. Yinga, tata.

216 Mpe na yina diabulu kotisaka boma mosi ya ntama kuna, muntu yina vwandaka seka mpe vwandaka sala mutindu bawu vwandaka na Mpeve-Santu. Mpe beno nionso ba-Pèlerin ya Sainteté, mpe ba-Busantu, mpe ba-Nazaréen, mpe beno nionso, me tala na manima mpe me tuba, “Ooh, mu zola ve ata mosi ya Yawu. Ooh!”

217 Oh, kyadi! Kana beno kuzwaka Mpeve-Santu, to kitini ya Nzambi na kati ya ntima ya beno, ya kusantisama mutindu beno zolaka vwanda, beno zolaka zaba ti ya kele Ngolo ya Nzambi.

Yesu tubaka ve, “Kana beno zabaka Moise, beno zolaka zaba Munu mpe”? Ya kieleka. Kana kusantisama kele kitini ya Mpeve-Santu yina sukulaka mpe santisaka beno; kana beno ke na Yawu, beno ke ndima yina me bikana na Yawu ntangu Yawu ke kwisa.

²¹⁸ Diboko *yayi* zaba diboko *yayi*. Yintu *yayi* zaba dikulu *yayi*. Ya kele kitini ya nzutu.

²¹⁹ Mpe Biblia ke tuba ti ya kele na makabu yivwa ya kimpeve; baprofete, milongisi, ba-evangeliste, mpe ku- . . . nyonso yina; mpe—mpe lutendulu ya bandinga, kuzonza na bandinga, kubeluka ya Kinzambi. Yawu ke zaba konso kitini ya Yawu.

²²⁰ Oh, beno ke yituka, “Mu zola ve kima mosi ya kusala na Yawu.” Fiu! Ya ke na kukumaka tiya na kizunga awa, mutindu yina ve? Ya kele kieleka. Samu na yinki? Samu na yinki? Ba bongisaka beno. Dibuundu ya beno me tuba mutindu yina, mpe ya kele samu na yina beno lendaka ve kusala yawu.

²²¹ Kasi mingi na kati ya beno ba-Methodiste me basika mpe me kuzwa Mpeve-Santu. Mingi ya beno ba-Baptiste me basika mpe me kuzwa Mpeve-Santu. Yinga, tata. Beno, mpe mingi ya beno Busantu me basika mpe me kuzwa Mpeve-Santu. Yinga. Samu na yinki? Beno ke kipe ve yina dibuundu me tuba. Beno tambulaka na kati ya Nsemo. Amen. Beno ke kipe ve yina ke salama. Beno zaba ti ya vwandaka ya Mfumu, mpe beno me tambula kaka na kati ya Yawu.

²²² Ti kiboba—ti mama ya kukula kuvwanda na manima kuna, mama ya bawu ya kukula. Yandi ke na kusalaka mutindu mama ya yandi na manima kuna, kento ya kindumba. Yandi salaka organisation. Yina kele lutumu ya kieleka ya mbandukulu ya mpasi, ntangu dibuundu ya Katolika kubongisaka. Na manima dibuundu ya ba-Lutherien kubongisaka na manima ya yandi. Na manima dibuundu ya ba-Methodiste kubongisaka na manima ya yandi. Na yina dibuundu ya ba-Baptiste kubongisaka. Mpe ntangu yayi ya kele na bankama sambanu mpe makumi yivwa na sambanu ya ba-organisation. Mpe Pentecote salaka kima mutindu mosi!

²²³ Nkembo! Yinki kele dyambu? Nzambi ke na kulakisa ti Yandi kele ve na kati ya organisation. Yandi kele na kati ya Mpeve, Mpeve-Santu. Alleluia! Alleluia! Yinga, tata.

²²⁴ Yandi ke kipe ve yina organisation ya beno kele. Ya kele buzoba. Ya kele ya kuvukana na mutindu ya Katolika mpe me vutuka na yawu, mpe me vwanda na kati ya yawu, mpe beno ke kuzwa kidimbu mosi yina yandi kele. Wanzio tubaka ve, “Basika na yandi, bantu ya Munu, mpe kota ve na masumu ya yandi, mpe Mu ke yamba nge”? “Beni simba ve bima ya yandi ya mvindu, mpe Mu ke yamba beno,” Mpeve-Santu ke na kuzonzaka.

²²⁵ “Mpe muntu nyonso yina ke baka kidimbu ya kibulu, to kisono ya nkumbu ya yandi.” Kana beto vwandaka na ntangu

ya kukota na yawu; ntangu ya munu me kuma na nsuka. Yinki kele mukanda ya nkumbu ya yandi? Protestantisme. “Beto sala kifwanisu mutindu yawu. Beto sala organisation. Dibuundu ya beto kele kaka nene mutindu dibuundu ya Catholique.” Bawu bakaka bima nyonso yayi. “Bawu vwandaka na mabuundu ya nene, mpe beto ke salaka, mpe. Beto kele kaka na mutindu ya kimvuka ya mbanza, na dibuundu ya beto, mutindu bawu kele na yawu na ya bawu. Beto sala kizizi na kibulu.” Mpe yinki Biblia ke tuba, yandi kele “KENTO ya kindumba,” mpe ya kele “KENTO ya KINDUMBA,” na nzila ya organisation.

²²⁶ Kasi Dibuundu ya Nzambi ya moyo kele na kimpwanza. “Yandi yina Mwana me tula na kimpwanza kele kieleka na kimpwanza.” Beno basika na yawu! Beno vwanda ya kufuluka na Mpeve ya Nzambi.

Bayinsi ke na kupanzana, Israel ke na kuboka,
Bidimbu yina Biblia zabisaka na ntuala;
Ba ke na kutanga bilumbu ya Bantu ya
makanda, ya kufuluka na boma ya nene;
“Vutuka, O nge yina me zimbana, na yina ya
nge.”

Kilumbu ya mpulusu me belama,
Bantima ya bantu me fuluka na boma;
Beno vwanda ya kufuluka na Mpeve ya
Nzambi, minda ya beno ya kukubika mpe ke
sema,
Beno tala na zulu! Mpulusu ya beno me
belama. (Amen.)

²²⁷ Wapi mutindu bima ke na kusalamaka! Yandi tubaka, na bilumbu ya nsuka, “Beno vwanda na boma ve, nkonga ya fyoti ya mameme. Ya kele luzolo ya Tata ya beno na kupesa beno Kimfumu,” ya kuvwanda kintwadi na bisika ya Mazulu.

²²⁸ Mpe beno ba-Methodiste, ba-Baptiste, ba-Presbytérien, bayina me seka Pentecote . . .

²²⁹ Mpe, mu ke tuba, Pentecote kele na nsatu ya Nsangu ya mbote ya mutindu ya ntama yina ke vutula matondo, samu bawu ke bongisa. Ba-Assemblée ya kieleka ya Nzambi kotaka na Pentecote ya kulutila nene, me kota kimvuka ya mabuundu, kaka ya mambu ya ngaanda mpe ya kuswaswana. Mpe mutindu ya kulutila yimbi yina mu me monaka ntete kusala ya Mpeve-Santu, na kutala, vwandaka na nzila ya milongi ya Pantekote. Na yawu beno banza ve, samu ti beno kele ya dibuundu ya Pantekote, beno kele ya kuvuluka.

²³⁰ Beno kele kaka ya kuvuluka na yina beno kele kieleka ya kubotama na Mpeve ya Nzambi, na nzila ya Mpeve-Santu, vukanaka na Yandi na Ngolo ya mvumbukulu ya Yandi, ke tambula na bidimbu mpe mambu ya ngitukulu, na kulandaka Mpeve yango kisika nyonso Yawu ke kwenda.

Bidimbu vwandaka landa baprofete. Bidimbu vwandaka landa Yesu Klisto. Bidimbu landaka bantumwa. Yandi tubaka, “Bidimbu yayi ke landa bawu,” tii Yandi ke vutuka dyaka.

“Ya me tuba yawu, Mpangi Branham?”

231 “Beno kwenda na yinza ya muvimba, mpe beno longa Ngolo yayi mpe kumonisama na bayinsi nionso.” Mpe ya ke kondwa zole na zulu ya tatu ya yawu, dyaka, me kuwaka Yawu ntete ve. “Mpe bidimbu yayi ke landa bawu.” “Bawu!” “Konso yinsi!”

232 Nkembo! Fiou! Oh, la la! Ya lenda vwanda ti beno ke banza ti mu kele kilawu. Mpangi, mu ke tuba na nge, mu zola nsambulu yayi ya mbote ya ntangu ya ntama. Yinga, tata, ke kotisa nge na Klisto!

233 Ntangu yayi beno me mona yina kidimbu ya kibulu kele? Ya kele kidimbu ya kumanga lukwikilu. Ya kele muntu yina kele. . . beno banza kaka, ti, “Mbote, mu kele ya dibuundu, mpe mu kele kaka mbote mutindu muntu yankaka. Mu kele ve ya dibuundu yayi?” Mpe beno me bakula, kisika organisation ya beno ya dibuundu ti beno ke na kutala, na wapi kisika ya me katuka? Beno me bakula?

234 Biblia ke tuba, “Yandi yina ke sambilaka kibulu, ke kuzwa kidimbu ya yandi, to kisono ya nkumbu ya yandi,” ntangu yayi beno tala mbote, “na mbunzu to na diboko,” yina kele *luzabu* to na *bisalu*. Yina zola tuba ve ti beno kele na nzoloko ya nene na kizizi ya beno. Ya fwana vwanda mutindu yina ve. Ya ke na kutuba ve na ngaanda. Ya ke na kutubila kimpeve.

235 Mpe beno tala yandi mbote mpe beno mona yina yandi zaba na yina me tala Masonuku. Beno kuwa yandi mpe beno mona kisika yandi ke kwenda. “Kana muntu mosi kele ve na Malongi yayi, ya kele ve na Nsemo na kati ya yandi,” Biblia me tuba. Beno me mona? Beno me mona? Beno tala mbote kisika yandi ke kwenda. Beno tala mbote yina yandi ke na kusala.

236 Yandi tubaka, “Mbote, mu—mu kele ya nge. Mu kele Protestant. Yinga, tata. Mu—mu kele ya dibuundu *yayi*. Yinga, tata.” Mpe na Lumingu beno ke vwanda kaka na buzitu mingi samu na yawu na kubasika na mvula. Yandi kwendaka kuna, na kisika ya kukwenda na lukutakanu ya bisambu, beno ke kanga dibuundu, mpe ke vwanda mpe ke tala televisyo. Yandi ke basika awa mpe yandi ke kunwa mpe ke sala mutindu yina, mpe ke sala mutindu yinza ya muvimba, kasi yandi kele ya dibuundu. Beno bambuka moyo, yina kele kidimbu ya disumu.

237 Ntangu yayi beto tanga mwa ntama, na nswalu, mpe kuna mu ke sukisa. Beto me luta ntangu. Beto tanga ntangu yayi nzila ya 6.

Mpe mu monaka kento ntangu yayi (dibuundu) ya kulawuka na menga ya basantu, . . .

238 “Ya kulawuka na menga ya basantu.” Beno zaba, Biblia ke tuba, ntangu ba bebisaka yandi, ti konso muntu yina ke kufwa kufwaka, na zulu ya ntoto, ba monaka foti na dibuundu ya Katolika. Ya kieleka, na mbandukulu.

. . . mpe na menga ya bambangi ya Yesu: mpe . . . (Jean ke na kutuba ntangu yayi) . . . mpe ntangu mu monaka yandi, mu kukiyufulaka na kuyituka ya nene.

239 Jean tubaka! Ntangu yayi beto tala awa. Jean tubaka, “Mu me tala yandi; yandi vwandaka kitoko mingi, dibuundu mosi ya kitoko. Yandi vwandaka na nkonga ya muvimba ya mabuundu yina butamaka na yandi, ‘mama ya bakento ya kindumba.’ Mpe mu me tala na manima kuna, mpe wapi mutindu kento yina . . . Yandi vwandaka pesa malongi yango ya luvunu, ke sala bantinu mpe bantu ya nene samu na kulawuka malafu na yawu. Mpe awa bana ya yandi ya bakento ke na kusala kima mutindu mosi. Kasi, mu me tala yandi; yandi vwandaka kitoko mingi!”

240 Kisika mosi na kati ya Masonuku me tuba, “Mu ke vwanda mutindu ntinu-kento mpe mu ke na nsatu ya kima mosi ve.” Beno me mona?

241 Mpe na yina yandi, Jean, tubaka, “Mu sepelaka na yandi. Mu talaka yandi, mpe mu talaka ya kitoko mingi. Mu sepelaka na yandi.”

Mpe na yina wanzio zabisaka munu, Samu na yinki nge ke na kuyituka? Mu ke tuba na nge . . . Mu ke tuba na nge mansweki ya kento, mpe . . . kibulu yina ke nataka yandi, yina kele . . . bayintu sambwadi mpe bibongo kumi.

242 Ntangu yayi beto mona kana beto vwandaka ya kusungama. Kana beto kele na mutindu ya Katolika, na yina beno zaba ti Protestantisme ke na kulanda yawu. Na yawu beno fwana . . . Beno, beno kele na mayele mingi samu na kuzaba yawu, beno me mona. Beno tala.

Kibulu yina nge monaka vwandaka, . . . kele ve; mpe kele . . .

243 “Kibulu.” Ntangu yayi beno tala mbote. Ntangu yayi beno ke tala awa, ya ke tuba lutangu ya bantinu yina vwandaka; mutindu ya kubwa, mosi fwana kwiza.

. . . mpe ke basika na dibenga ya yinda, . . .

244 Ya kele ve na zulu ya Biblia! Na nkonga ya balukwikilu ya luvunu yina kusalamaka. Ya kele ve na lufulu samu na yawu. Wapi kisika beno ke kuzwa “kombelo”? Wapi kisika beno ke kuzwa yayi “nsuni ya kukondwa busantu,” mpe “nganga-Nzambi yina ke kwelana ve,” mpe bima nyonso yankaka yayi bawu ke salaka, “ke funguna”? Wapi kisika beno ke kuzwa yawu? Ya kele ve na kisika na kutala yawu. Ya me basika na

difelo. Biblia me tuba mutindu yina. Ya me basika, kibulu, ngolo, malongi ya vwandaka, “Basika na dibenga ya yinda.”

. . . mpe ke kwenda *na nzimbani*: . . .

245 Wapi kisika kele “nzimbani”? Difelo. Ke vutuka kaka na kisika yina yawu me katuka.

. . . *mpe bayina ke zingaka na zulu ya ntoto ke yituka, bayina bankumbu kele ve ya kusonika na buku. . . kubanda mbandukulu ya yinza, ntangu bawu talaka kibulu yina vwandaka, . . . kele ve, mpe dyaka kele.*

246 Ntangu yayi, mabuundu ya ba-Protestant ke tuba, “Mbote, wapi mutindu ya lendaka vwanda, ntangu ba ke tuba, ‘Mu ke kwikila Yesu Klisto. Yandi kele Mvulusi ya munu mosi?’ Dyabulu ke kwikilaka, mpe, mpangi.

247 Ya fwana vwanda kuvutuka ya malu-malu, Mbutukulu ya malu-malu, kubutuka mbala zole. Mpe ntangu beno me butuka ya mbala zole, ba me tula nkumbu ya beno na kati ya Buku ya Luzingu ya Mwana-dimeme.

248 Beno ke tuba, “Mu ke kukiyufulaka bambala mingi. Mbote, yinki, mu kele mbote ve mutindu muntu yankaka? Mu kele ve mbote mutindu nkonga ya nge ba-exalté yina ke banzaka mbote ve? Mu kele na mayela. Mu kele na yawu na kati. . . Mu kele na ba-diplôme. Mu me basika na lukolo ya nene. Mu me katuka na dibuta ya mbote. Bantu ya munu vwandaka bamambeke ya dibuundu, na ntuala ya munu. Mu kele ve mbote mutindu beno?”

249 Ya me tuba, “Yinza ya muvimba,” Protestant mpe nyonso, “yitukaka,” nyonso kana bayina bankumbu kele ya kusonama na kati ya Buku.

250 Samu na yinki bankumbu kele ya kusonama? Ba kele Nkuna ya Abraham, “mpe kele bibyadi landila nsilulu, ya kusoola ntete mbandukulu ya yinza.” Ya kele samu na yina bawu ke yituka ve. Beno tala awa, ntangu yayi beno tala mbote yina yandi tubaka. Beno tala mbote bayayi na Buku ya Luzingu ya Mwana-dimeme.

Mpe awa mayuki ya yina kele na ndwenga.

251 Ntangu yayi mu zola kuyufula beno kima mosi. Ya kele na ndwenga mosi ya makabu ya Mpeve-Santu? [Dibuundu me tuba, “Amen.”—Mu.] Ya kieleka? Bantu yikwa ke kwikila ti Biblia, ba-Corinthiens ya Ntete kapu 12, ke longa ti makabu mpe nionso na kati ya dibuundu, kele na ndwenga, beto tala, mosi ya makabu? Mbote, wapi mutindu beno lenda tuba ti ya kele ve na kuzonza na bandinga kuna? Wapi mutindu beno ke tuba ti ya kele ve na lutendulu ya ndinga? Wapi mutindu beno lenda tuba, ya kele ve na kubeluka ya Kinzambi? Samu ti nzutu mosi. . . Kana mu kele nzutu, beno ke na diboko na lweka *yayi*, mpe diboko na lweka *yayi*, mpe dikulu *kuna*, wapi mutindu beno lenda tuba ti diboko kele, dikulu ve? Beno kuwaka ve yina Paul tubaka?

252 Ntangu yayi beno tala mbote, yandi ke na kuzonzaka na bilumbu ya nsuka, mbala mosi na Nzutu, yandi tubaka, “Awa keke na yandi yina keke na ndwenga.” Oh, mu zola yayi. Oh, la la! Beno tala yina ke kwamisa beno. Beno kuwa yayi. Mbote mingi. “Awa keke dibanza yina keke na ndwenga.” Kana makabu yango ya Mpeve-Santu kulumukaka ve na nsungi nyonso, samu na yinki yandi zonzaka yayi samu na bilumbu ya nsuka kuna? Kana ya ke vwanda ve na makabu na kati ya dibuundu, na bilumbu ya nsuka, samu na yinki yandi me sungika yayi tii na bilumbu ya nsuka? “Awa keke na yandi yina keke na ndwenga.”

. . . Bayintu sambwadi keke myongo sambwadi, na yina kento keke ya kuvwanda.

253 Myongo yikwa? Bambanza yikwa na yinza, ata ti, dibuundu keke ya kuvwanda na zulu ya myongo sambwadi? Kaka mosi. Wapi kisika ya keke? Mbanza ya Vatican na Rome. Ya keke kieleka? [Dibuundu me tuba, “Amen.”—Mu.] Biblia ke tuba ti kento ya kindumba ya boma yayi yina salaka yinza nyonso kusala kindumba, mpe basisaka nkonga mosi ya mwa bana ya bakento samu na kulonga na zulu ya kima mutindu mosi yandi salaka; ba vwandaka ve yimbi mutindu yandi, kasi ba vwandaka bakento ya kindumba. Yandi longaka bawu mutindu mosi. Yandi tubaka, “Mbandukulu ya yawu ke vwanda kento,” to dibuundu, “ya kuvwanda na zulu ya myongo sambwadi,” na Rome. Mu me talaka yinza ya muvimba; mu me tuba na munu kisika ya keke, “dibuundu ya kuvwanda na zulu ya myongo sambwadi.” Ntangu yayi mu ke na kutangaka yayi na Biblia.

Mpe ya keke na bantinu sambwadi: tanu me kubwa, . . .

254 Kana beto baka disolo, mpe kuvutuka kaka mpe kulakisa yawu, kisika bantinu kubwaka, na Rome, kubanda kimfumu ya Babylone.

. . . mosi keke (Néron), mpe mosi ke kwisa; mpe . . . yandi fwana landila mwa ntangu fioti (pene ya bangonda sambanu) ntangu yandi ke kwisa.

255 “Mpe kibulu . . .” Ooh! Beno tala yayi. Ntangu yayi ngolo ke baka kisika ya mimpani.

Mpe kibulu yina vwandaka, mpe keke ve, mpe . . . keke ya nana, (ntangu yayi beno tala mbote) mpe keke ya sambwadi, . . .

256 Beno nionso zaba ntinu ya boma yina yandi vwandaka. Yandi ku- . . . Yandi kangaka mama ya yandi na mwa-mpunda ya yinti mpe tambusaka yandi na babala-bala, mpe tulaka tiya na mbanza, mpe vwandaka bula lyre na zulu ya mongo. Ya keke mutindu mosi ya mpeve yina ke na kuyala dibuundu yina keke ya kuvwanda na kisika ya bumpani. “Ya nana, yina keke ya sambwadi. Mpe na yina yandi keke, mpe keke ve; mpe keke, mpe keke ve; mpe keke, mpe keke ve,” na kulandilaka.

. . . mpe ke kwenda na nzimbani.

257 Tii na ntangu ya Nkwizulu ya Mfumu, mpe ba ke losa yandi na difelo.

Mpe bibongo kumi yina nge monaka kele bantinu kumi, yina kuzwaka ntete ve bimfumu; kasi ke yala kaka ngunga mosi kintwadi na kibulu.

258 Oh, kana beto vwandaka kaka . . . “Beto kuzwaka ntete ve ngolo.” Ba kele ve bantinu. Ba vwandaka ve . . . Ba lendaka ve kusala yawu. Bibongo vwandaka ve na bayimpu. “Ba me kuzwa ngolo mutindu bantinu.” Yinki ya kele? Bamfumu ya nkú; ba me byadisa bantinu ve. Bamfumu ya nkú! Oh, la la!

259 Ntangu yayi, oh, ntangu mu ke tanga yayi, ntangu yankaka ntima ya munu ke kubwa na kyese, mbote mingi, ntangu mu ke banza na mutindu beto ke na kuzinga awa na kilumbu ya nsuka.

Mpe bibongo kumi yina nge monaka kele bantinu kumi, yina me banda ntete ve na kuyala; kasi ke yala kaka ngunga mosi kintwadi na kibulu.

Bayayi kele na dibanza mosi, mpe ke pesa ngolo ya bawu mpe ngolo na kibulu.

Bayayi ke sala mvita na Mwana-dimeme, mpe Mwana-dimeme ke nunga bawu: . . .

260 Bitumba ya Harrmaguédon ke kwisa; ya kukubama samu na Millenium.

. . . samu ti yandi kele Mfumu ya mfumu, mpe Ntinu ya ntinu: . . . (beno ningana ve) . . . mpe bayina ba bokilaka, ba soolaka, . . .

261 Ve; Yandi kele na yawu. Beno kele na Mpeve-Santu, beno fwana boka lunungu. Nzambi soolaka beno ntete mbandukulu ya yinza. Kana beno lenda ve kumona Nsemo ya Nsangu ya mbote, ya kele samu ti beno—beno kele kaka ya kufwa meso.

. . . basolami, mpe ya kukwikama.

Mpe yandi tubaka na munu, Bamaza yina nge me mona, kisika kento ya kindumba kele ya kuvwanda, kele bantu, . . . bankonga, mpe bayinsi, mpe bandinga.

262 Na nzonzolo yankaka, kento yayi me vwanda awa, dibuundu, ke pesa malongi ya yandi na bantu nyonso, nkonga ya bantu, mpe ya ndinga. Yandi yayi. Yandi vwandaka na luyalu na zulu ya bawu. Yandi kele ya kuvwanda na zulu ya bawu, ngolo vwandaka yala na zulu ya yawu. Yandi kele ya kuvwanda na zulu ya myongo sambwadi, ya kulwata bilele ya kitoko ya mbwaki, yina ke lwata na bumvwama mingi na yinza. Yandi yayi.

Mpe bibongo kumi yina nge monaka na zulu ya kibulu, bayayi ke . . .

263 Beno tala mbote ntangu yayi, beno ke kota na bangolo ya communism.

...bawu yina ke yina kento ya kindumba, mpe ke katula yandi nionso mpe ke tula yandi kinkonga, mpe ke kudya nzutu ya yandi, mpe ke yoka yandi na tiya.

Samu ti Nzambi me kotisa na kati ya bantima ya bawu samu na kulungisa luzolo ya yandi, mpe samu na kuwisana, mpe ke pesa kimfumu ya bawu na kibulu, tii bandinga ya Nzambi . . . kusalama.

264 Alleluia! “Mazulu na ntoto ke luta, kasi Ndinga ya Nzambi ke luta ata fioti ve.” Beno tala!

...kento yina nge monaka . . .

...kento yina nge monaka kele mbanza yango ya nene, yina yalaka na bantinu ya ntoto.

265 Beno lakisa munu mbanza mosi na yinza yina ke na kuyala na zulu ya bantinu ya ntoto, na mutindu nyonso yina beno zola, na ngaanda ya bukimfumu ya Katolika na Rome, ya kuvwanda na zulu ya myongo sambwadi. Ata mbanza mosi ve, mpe ata mbala mosi ve, mpe ata mbala mosi ve ke vwanda; na ngaanda ya Mbanza ya Malu-malu yina katukaka na Mazulu. Ya kele kieleka.

266 Ntangu yayi, na mwa ntangu fioti. Mu zola kulakisa beno yayi dyaka, samu ti Mfumu kuvwanda na dibanza mpe kusakumuna beto kintwadi na yina beto ke tanga yayi. Mbote mingi. Beno tala mbote awa ntangu yayi, mu ke na kutangaka kapu ya 13. Mu ke na kubandaka na nzila ya 15.

Mpe yandi vwandaka na ngolo ya kupesa luzingu na kizizi . . .

267 Yina kele na Etats-Unis, yina beto monaka me kwisa, beno me mona, kifwani mosi.

...ti kizizi ya kibulu zolaka zonza, mpe samu na yina bantu mingi yina ke zolaka ve kusambila kizizi ya kibulu zolaka kufwa. (Ya kele kumanga.)

Mpe yandi salaka bawu nyonso zole, bana ya fyoti mpe ya nene, ya bimvwama mpe ya mputu, muntu ya mpika mpe muntu ya kimpwanza, samu na kuzwa kidimbu na diboko ya bawu ya kibakala, to na . . .-mbu.

Mpe ti muntu ve lendaka sumba to kutekisa, kana kaka yandi yina kuzwaka kidimbu, to nkumbu ya kibulu, to lutangu ya nkumbu ya yandi.

268 Ntangu yayi beno tala mbote, ntangu yayi, na bukebi ntangu yayi, na bukebi nionso, na ntwala beto sukisa. Nzila ya 18. Beno kuwa.

Awa kele ndwenga.

269 Beno me mona Mpeve-Santu ke bokila bakwikidi na kilumbu ya nsuka? Mwa kimvuka yina kuna, ke tuba, ke bokila

mwa kimvuka yina na kilumbu yayi, “Awa keke na yandi yina keke na ndwenga na dibuundu. Ti yandi bakula yayi.”

. . .Ti yandi yina keke na lubakusu tanga balutangu ya kibulu: samu ti ya keke lutangu ya muntu, (yinsi ve) muntu; mpe lutangu ya yandi keke Bankama sambanu ya bamvula tatu na makumi sambanu.

²⁷⁰ Mpe kuna na zulu ya Mbanza ya Vatican . . . Beno tuba na munu ve ntangu yayi; mu keke na *Mambu Ya Lukwikilu Ya Beto*, mpe nionso yina, beno me mona. Kuna na zulu ya Mbanza ya Vatican, mpe pape keke ya kutelama mutindu “vicaire ya Mwana ya Nzambi.” Mu keke na bankundi ya Katolika ya kuvwanda kaka awa, yina vwandaka bantu ya Katolika, ya kuvwanda awa mpe zaba ti ya keke kieleka. Bantu ya munu, mu banza, na ntwala ya munu, vwandaka bantu ya Katolika, mpe. Beno me mona?

²⁷¹ Ba bokilaka Santu Patrick Catholique, mpe yandi vwandaka ata fioti ve Catholique. Yandi tubaka Jeanne d’Arc vwandaka santu; mpe banganga-Nzambi yokaka yandi mutindu ndoki. Kuyituka ve ti Yesu tubaka, “Beno bayina ke kumisaka mpembe bantoni ya ba-profete, mpe beno tula yawu na kati kuna, beno bibaka ya mpembe.” Ya keke kieleka.

²⁷² Beno tala mbote, ya keke lutangu ya muntu. Mpe kuna na pape ya Rome, ba sonikaka yawu, “VICARIVS FILII DEI.” Ba sonikaka yawu na bisono ya Rome. Sonika yawu kaka nge mosi, mbasi. V, I, C, I, R, oh, beno landila kaka mutindu yina, na bisono ya Rome, mpe beno baka nzila ya beno mpe beno bwela yawu, mpe beno mona yina beno keke na yawu: bankama sambanu na makumi sambanu na sambanu. Wapi kisika yandi keke ya kuvwanda? “Na zulu ya myongo sambwadi.”

²⁷³ Mpe kuna me basika organisation ya nsambulu, yina longaka dogme na kisika ya Biblia. Mpe ba-Protestant me basika na yawu, mpe ke na kusalaka kaka kima mutindu mosi bawu keke, samu ti Yandi tubaka ti yandi vwandaka “KENTO ya kindumba,” mpe bawu vwandaka “BAKENTO ya kindumba.” Ke basika na mbotika ya luvunu, na nsambulu ya luvunu, na dibanza ya luvunu ya Mpeve-Santu, na dibanza ya luvunu ya difelo, mpe bima nyonso yayi mutindu yina, mpe ba-Protestant ke na kulanda kuna na makulu.

Kasi ya keke vwanda na Nsemo na ntangu ya
nkokila,
Beno keke mona kieleka nzila ya Nkembo; (Ya
kieleka.)
. . . nzila, keke Nsemo bubu yayi,
Luzikulu na Nkumbu ya ntalu ya Yesu.
Ntwenya mpe kuluntu, beno balula ntima
samu na masumu ya beno nyonso,

Mpeve-Santu kieleka ke kota;
 Bansemo ya nkokila me kwiza,
 Ya kele dyambu ti Nzambi mpe Klisto kele
 Mosi. (Amen!)

²⁷⁴ Mpangi, mu ke tuba na beno, ya kele Bansemo ya nkokila ke na kulezima. Malongi mosi ya bantumwa, mbotika mosi ya bantumwa, kifuluka mosi ya bantumwa ya Mpeve-Santu, bidimbu mosi ya bantumwa mpe mambu ya ngitukulu, ke na kutala na nzila ya Bantu ya makanda; mutindu bawu salaka na ba-Juif, kuna na suka-suka, awa ya kele na kati ya kulala ya mwini.

Ya kele pene na bisika nyonso bantu,
 Bayina bantima kele nyonso na tiya
 Na Tiya yina kubwaka na Pantekote,
 Yina sukulaka mpe vedisaka bawu;
 Oh, ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi!
 Mu kele na kyese mingi ti mu lenda tuba ti mu
 kele mosi ya bawu.

Mosi ya bawu, mu kele mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Bawu vwandaka ya kuvukana na kivinga ya
 zulu,
 Bawu nyonso vwandaka sambila na Nkumbu
 ya Yandi,
 Bawu vwandaka ya kubotama na Mpeve-
 Santu,
 Mpe ngolo ya kisalu kwizaka;
 Ntangu yayi yina Yandi salaka samu na bawu
 kilumbu yina
 Yandi ke sala samu na beno mutindu mosi,
 Mu kele na kyese ti mu lenda tuba mu kele mosi
 ya bawu. (Beno ve?)

Beno kwiza, mpangi ya munu, kusosa
 lusakumunu yayi
 Yina ke vedisa ntima ya nge na disumu,
 Ya ke sala bangunga ya kyese kuwakana
 Mpe ke bumba moyo ya beno na tiya;
 Oh, ya ke na kupela ntangu yayi na kati ya
 ntima ya munu,

Oh, nkembo na Nkumbu ya Yandi,
Mu kele na kyese mingi ti mu lenda tuba ti mu
kele mosi ya bawu.

275 Oh, samu na Nsangu ya mbote yayi ya nkembo!

Ya ke na kubasika mingi na menga, yinga, ya
ke na kubasika mingi na menga,

276 Tanga ntalu! “Kana yandi ke landa Munu, ti yandi
kukimanga yandi mosi, yandi baka kulunsi ya yandi,” lufwa,
“mpe landa Munu.”

Nsangu ya mbote ya Mpeve-Santu yayi ke na
kubasika mingi na menga,
Menga ya bilandi yina kufwaka samu na
Kieleka,
Nsangu ya mbote ya Mpeve-Santu yayi ke na
kubasika mingi na menga.

Muntu ya ntete yina kufwaka samu na dikani
ya Mpeve-Santu yayi,
Vwandaka Jean Mubotiki, kasi yandi kufwaka
mutindu muntu;
Na manima kwizaka Mfumu Yesu, ba komaka
Yandi na kulunsi,
Yandi longaka ti Mpeve ke vulusa bantu na
masumu.

Ya vwandaka na Pierre mpe Paul, mpe Jean ya
ntumwa,
Ba pesaka baluzingu ya bawu samu Nsangu ya
mbote yayi lezima;
Ba vukisaka menga ya bawu, na baprofete ya
ntama,
Samu Ndinga ya kieleka ya Nzambi kupesama
na kusungama.

Na manima ba losaka matadi na Étienne, yandi
longaka na kuteleminaka disumu,
Yandi salaka bawu kudasuka mingi, bawu
pasulaka butomfo ya yandi;
Kasi yandi kufwaka na Mpeve, moyo ya yandi
kubasikaka,
Mpe yandi kwendaka kutana na bantu
yankaka, bampangi ya yandi minati ya
luzingu.

Ya ke na kubasika mingi na menga, yinga, ya
ke na kubasika mingi na menga,
Nsangu ya mbote ya Mpeve-Santu yayi
landilaka na kubasika mingi na menga,

Menga ya bilandi yina kufwaka samu na Kieleka,
 Nsangu ya mbote ya Mpeve-Santu yayi landilaka na kubasika mingi na menga.
 Mioyo na yisi ya autel, ke na kudila, “Bilumbu yikwa?”
 Samu ti Mfumu kunganina bayina kusalaka yimbi; (Kuseka, beno me mona. Oh, la la!)
 Kasi ya ke vwanda na mingi yina ke pesa menga ya bawu ya luzingu
 Samu na Nsangu ya mbote ya Mpeve-Santu yayi mpe kufuluka ya yawu ya mbwaki.
 Ya ke na kubasika mingi na menga, yinga, ya ke na kubasika mingi na menga,
 Nsangu ya mbote ya Mpeve-Santu yayi landilaka na kubasika mingi na menga,
 Menga ya bilandi yina kufwaka samu na Kieleka,
 Nsangu ya mbote ya Mpeve-Santu yayi ke na kubasika mingi na menga.

277 Beto baluka, kupesana mosi na yankaka diboko ntangu yayi.

Ya ke na kubasika mingi na menga, yinga, ya ke na kubasika mingi na menga,
 Nsangu ya mbote ya Mpeve-Santu yayi ke na kubasika mingi na menga
 Menga ya bilandi yina kufwaka samu na Kieleka,
 Nsangu ya mbote ya Mpeve-Santu yayi ke na kubasika mingi na menga.

278 Beno zola Mfumu? Mfumu kusakumuna beno.

279 Tata, beto ke sambila ti Nge ke sakumuna bantu yayi, mpe ti bawu kwenda na yinzo na kyese. Bika bawu kwisa na Kiziba yina me fuluka na Menga, yina basikaka na misisa ya Emmanuel. Bika ti bawu bika mitindu nyonso ya ntama ya dibuundu, mpe kukwiza mpe kuzwa Mpeve-Santu. Beto ke sambila na Nkumbu ya Yesu. Amen.

Nzambi sakumuna beno. Mpimpa ya mbote. Nzambi vwanda na beno.



KIDIMBU YA KIBULU KNG54-0513

(The Mark Of The Beast)

Nsangu yayi ya Mpangi William Marrion Branham, kulongamaka na Kingelesi, na Kilumbu ya yiya na nkokila, na kilumbu ya 13 ya Ngonda ya tanu, na mvula 1954, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org